



宋宰輔編年錄卷之十七

宋太常博士徐自明著

孝宗紹興三十二年

十月己巳史浩叅知政事

自翰林學士知制誥兼修玉牒兼侍讀遷左中大夫

除

浩字直翁慶元鄞縣人浩由太學博士改秩自

此六年以至相位近世未有也紹興三十年二

月孝宗自普安郡王立為皇子封建王以史浩

為直講王十朋為小學教授三十二年六月立

為皇太子以宗正少卿張闡為右諭德起居郎

史浩爲左庶子六月丙子即帝位高宗稱太上皇帝應軍國事並聽嗣君處分帝既即位以史浩爲中書舍人兼侍讀尋遷翰林學士知制誥是月遂除叅知政事九月戊辰兼權知樞密院事十一月辛酉免兼從所請也十二月乙丑常朝史浩論樞密院合使宰相兼使事因引富弼對仁宗皇帝故事上曰正合朕所見陳康伯力辭上曰此不易之論毋多遜也詔宰相今後依舊兼樞密使逆亮南牧邊廷用兵建王抗疏請爲先驅誓不與賊俱生公方以疾移告聞之亟

往問孰爲大王計悞矣國步方艱父子豈可須臾離使唐肅宗能隨明皇幸蜀安得有靈武事建王大悔立俾公草奏請扈蹕以供子職辭意懇到高宗聞議出於公歎曰真王府官也廟堂方議以建王督師由是不果遂從視師之行而內禪之意決矣公明年正月遂拜相

行狀

十月己巳葉義問罷知樞密院事

自左通議大夫爲資政殿學士提舉

太平興國宮

義問自紹興三十年正月除同知樞密院事七月除知樞密院事三十二年七月兼權叅知政

事是月罷執政踰二年上初即位除義問左通  
 議大夫至是殿中侍御史張震右正言周操交  
 章彈義問義問乞解機政故有是命張震再論  
 義問以誤國得罪貪黷見黜願褫職罷祠詔義  
 問改端明殿學士依舊提舉太平興國宮隆興  
 元年三月右諫議大夫劉度御史中丞辛次膺  
 相繼論列義問落職依前提舉興國宮饒州居  
 住後復改資政殿學士提舉洞霄宮六年八月  
 卒贈銀青光祿大夫

戊子張燾同知樞密院事

自資政殿學士左太中大夫提舉太平興國宮除

燾奏當今弊政宜有所更革上乃曰朕惟天下  
 有弊事無弊法今日之弊在乎因仍習俗若改  
 而更張宮商斯在張燾所奏犁然有契予衷詔  
 集侍從臺諫赴都堂條具方今特務以聞

十二月丁卯宰相陳康伯兼樞密使

宰相仍舊兼樞密使

制曰熙帝載而使宅百揆時有賴於一賢佐天子而  
 鎮撫四夷事難分於二柄爰稽古訓加賁宗臣瞻維  
 文武之兼資並用安危之注意錫以渙命颺於廟朝  
具官陳康伯渾厚而直剛溫方而和裕學足以探天人之  
 蹟識足以周事物之幾正論不回凜松柏後凋之操

至誠自守抱蘋繁明信之衷蚤際遇於上皇遂登崇  
於碩輔望隆華夏名著鼎彝胡馬飲江首決親征之  
策時龍御漢獨高顯相之功朕惟兵律之尚煩念邊  
防之未靖欲圖妙筭協濟多虞考藝祖仁宗之宏規  
遵建炎紹興之聖政肆令東府仍筦西樞與言屬任  
之專宜有疏榮之寵是用申褒徽數特表殊庸方邑  
增腴并實新畬之入公圭胙國進荒故里之封亶峻  
民瞻允符僉穆於戲宣王復文武之境倚元老之壯  
猶齊人歸鄆謹之田資真儒之無敵顧有爲者亦若  
是矧時則勿有間之其追繼於前修以益光於末世

隆興元年 癸未

正月庚午史浩右僕射

自叅知政事除左通奉大夫  
守右僕射同中書門下平章

事兼樞  
密使

制曰朕欽奉聖謨惕臨初政人主之職論相念圖任  
之惟艱大臣以道事君豈登庸之可後眷予賢佐久  
穆政塗宜陞次輔之聯誕播明廷之號具浩官高明而  
端亮寬裕而直方學窮聖道之微損益可知於百世  
識周天下之務文武爲憲於萬邦蚤由顓俊之公夙  
有濟時之望資爾耆德傳我潛藩王求多聞舊服盤  
庚之學帝眷予弼有若傳說之賢茲嗣守於慶基亟

入參於機務以心膂之臣而任之勿貳竭股肱之力  
而知無不爲一新萬化之原寢格九功之叙肆稽民  
譽其遂相予仍兼樞筦之司大啟封侯之宇崇階增  
峻多戶申陪惟眷倚之益隆顧責成之彌重於戲予  
欲循堯道而致時雍之化爾其迪百志之熙予欲廣  
文聲而卒外攘之功爾其贊五兵之運同蕭何之心  
而安四海守宋璟之文而佐中興時乃之休副朕所  
望

公既相首言前宰相趙鼎參政李光之無罪大  
將岳飛之父寃宜復其官爵錄其子孫凡坐廢  
者次第昭雪悉從之袁孚罷右正言公曰初政  
而遽去諫官何耶孝宗曰妄言德壽宮有私酤  
公曰陛下事親可謂曲盡然宮中左右皆閹宦  
有何知識若非言路時以正論折其萌則將有  
甚此者上怒少霽又奏諫官無故而罷天下必  
以爲疑若暴其罪惡恐故兩宮之間願少須之  
使其引去尋除直秘閣知溫州自是益無纖芥  
之隙

同日張浚樞密使

自少傳觀文殿大學士充江淮東西路宣撫使節制沿江軍馬魏國

公除

初上自藩邸熟聞公德望臨朝之初顧問大臣  
咨嗟歎息召公赴行在賜公手書曰朕初膺付  
託以眇然一身當萬幾之煩夙夜祇懼未知攸  
濟公爲元老被上皇禮遇之久羣臣莫及宜有  
嘉謀至計輔朕初政方今邊陲未靖備禦之道  
實難遙度思一見公面議其當使了然如在目  
中繫公是望公其疾驅副朕至意公奏曰臣敢  
不以前日恪事上皇之心事陛下惟一其志有  
殞無貳遂就道未至國門敦促再三即引見上  
見公改容體貌曰久聞公名今朝廷所恃惟公

命內侍賜公座降問再四公奏人主以務學爲  
先人主之學本於一心一心合天何事不濟云  
云上悚然曰當不忘相公之言公又奏今日便  
當如創業之初宜每事以藝祖爲法公見上天  
錫英武因力陳和議之非勸上堅志以圖事制  
除公少傅江淮東西路宣撫使節制沿江軍馬  
進封魏國公浚辭少傅詔勉從所請

除少傅制曰周公三年而歸大慰國人之望吉甫萬  
邦爲憲是增盟府之勳眷予社稷之元臣方茂邊陲  
之重寄誕敷制綽敷告廷紳具官張浚自明克誠允文且

武事親之孝實上通於神明許國之忠可兼貫於日月蚤登庸於次輔克左右於中興一德格天四海奠枕殊方震懼聞姓字以膽寒多士歸依想儀容而心悅即其効之若此知夫中之所存乃因勤勞旋請閑退又徜徉於泉石靡事浮沉茲表裏於江淮果煩經畧太上皇深惟眷注予一人敢後褒崇絺冕篆車峻陞亞傅綉裳黼袞改胙大邦增使節以寵元戎總兵符而護諸將尚仍書殿之貴以壯轅門之權進衍戶封增陪井賦以究經綸之蘊以終恢復之圖於戲誦宣王任賢使能之詩朕喜得將明之助鑒光武略地

屠城之戒公宜以安集爲先勉期戢於干戈佇歸安

於槐鼎伊惟耆哲奚俟訓詞

此自特進觀文殿大學士判建康府專一措置

兩淮事務兼節制淮東西路建康鎮江府江淮軍馬除時紹興三十二年六月甲子

十一月有旨召宣撫判官陳俊卿及公子棫赴行在公附奏曰今日之事非大駕親臨建康則決不能盡革宿弊一新令圖鼓軍民之氣動中原之心上見俊卿等問公動靜顏貌曰朕倚魏公如長城不容浮言搖奪是年正月九日制除公權樞密使都督江淮東西路屯駐兵馬依前少傅魏國公且命即日開府視事應千恩數並



依見任宰相條例施行

除樞密使制曰矐神武以折遐衝莫重本兵之任倣  
師徒而討亂略尤嚴督府之權自非文武之兼資曷  
稱安危之劇寄疇咨舊德屬我宗臣其敷廷紘之華  
亶告垂紳之聽具官張浚器周而用遠實大而聲聞學造  
聖真適堯舜文王之道行高世表會會騫孝已之名  
蚤際遇於中興寢延登於次輔言言忠烈與日月以  
爭光表表功名安社稷以爲悅肆予紹服趣使來歸  
表裏江淮畀中權而獨運汎掃宇宙抱素志以弗渝  
顧委任之雖專念規拳之未究是用峻登樞筦肇正  
使名考葛亮總戎之稱用謝安督軍之號載疇多賦  
併衍新畚益昭幕府之光增重本朝之勢於戲吉甫  
爲憲先元戎十乘以啟行裴度視師宜兩河諸侯之  
聽命惟位崇者報益厚惟望峻者志彌堅其茂對於  
孚休終有辭於末世

三月詔公赴行在既至上從公言乃命李顯忠  
出濠州趨靈壁邵宏淵出泗州趨虹縣顯忠等  
大破虜將蒲察徒穆及僞知泗州周仁與蕭琦  
等降之中原震動歸附日至上手書曰近日邊  
報中外鼓舞十年來無此克捷時虜名酋猛將

降執係道精甲利兵破亡不啻三倍是後不能  
復爲靈壁虹縣之屯矣公恐盛夏人疲急召顯  
忠等還而僞副元帥紇石烈志寧率兵大至既  
戰我師小不利軍心頗搖顯忠遂夜引歸公獨  
與子棻留盱眙俾將士悉歸懋而後還維揚具  
奏待罪上手書拊勞公復奏有旨降特進爲江  
淮宣撫使時上對近臣未嘗名公獨曰魏公每  
遣使來必令視公飲食多寡肥瘠何如其眷禮  
如此五月癸酉以少傅樞密使都督江淮東西  
路建康鎮江府江陰軍江池屯駐軍馬兼都督

荆襄軍馬張浚降授特進依前樞密使都督以  
兵敗於宿州故也六月輔臣進呈降授特進樞  
密使張浚見措置江淮軍馬理宜增重事權詔  
可復都督江淮軍馬初浚以符离之役降特進  
上曰罷樞密使宰臣陳康伯奏曰如此却是罷  
政上曰可改都督府爲宣撫司至是叅贊軍事  
陳俊卿奏降官示罰古法也亦其自請改都督  
府爲宣撫司恐使人情觀望號令不行上曰此  
未可也及殿中侍御史周操論都督之名實國  
家用人之權柄豈得亦行遞減上曰此論甚當

可與復都督府康伯奏已有指揮召浚之子栻  
候到日降指揮上然之八月浚復都督

二月癸未黃祖舜罷同知樞密院事資政殿學士知潭州

祖舜自紹興三十一年九月除同知樞密院事

是年二月罷在樞府一年餘上初即位除左通

議大夫七月壬戌兼權叅知政事是月祖舜累

引疾乞解機務故有是除乾道元年正月提舉

太平興國宮三月卒累左通奉大夫贈銀青光

祿大夫

三月癸巳張燾叅知政事自同知樞密院事遷太中大夫除

辛次膺同知樞密院事自御史中丞遷左中大夫除

燾再辭新除叅知政事恩命詔燾為資政殿大

學士提舉萬壽觀兼侍讀燾奏乞還鄉治疾從

之尋以資政殿大學士致仕乾道三年九月卒

贈宣奉大夫謚曰忠定○次膺字起李其先東

萊人山東亂舉其家南渡

五月史浩罷右僕射除觀文殿大學士知紹興府

制曰宅百揆以奮庸夙倚代天之業以八命而作牧

有嚴分陝之權睠次輔之能賢釋近司之重任其孚

大號用論羣工具官心術通明器資疆濟植學造聖

賢之與摛文舉河漢之華由義居仁自許古人之事  
業垂聲邁烈庶幾君子之風猷屬予纂序之初積以  
潛藩之舊甫經半載躡寘中台位雖峻而愈謙事蓋  
多而益辦方今內政粗修而國論未一遠人不服而  
邊虞實深俾圖莫適於攸居救弊方期於公道嘉謀  
嘉猷則入告繁左右之是資朕心朕德惟乃知亦始  
終之弗替曾微纖芥遽露封章荐形懇款之辭蔑副  
挽留之意俾歸相印肆舉邦彝昇邃職於殊恩䟽榮  
既腴涖介藩於全越席寵維新以昭體貌之公以薦  
股肱之眷申褒蕃數亶謂隆私於戲三階平而風雨  
時相慶君臣之遇九里潤而京師福勿云中外之殊  
往祇忱言永綏燕譽

浩自是年正月拜右僕射至五月罷入相四月  
以不與出師之議力丐免御史王十朋亦有言  
也○初張浚屢奏欲取山東公力爭其不可繼  
而大將李顯忠邵宏淵乞進兵公又奏之浚繼  
請入覲乞即日降詔幸建康孝宗以問公公陳  
三說孝宗感悟浚言陛下當以馬上成功豈可  
懷安以失事機公執不可退又以詰公公曰帝  
王之兵當出萬全豈可嘗試而僥倖今不審思

將貽後悔又上疏力諫曰靖康之禍臣子孰不痛心疾首思欲蹀血虜廷以雪大耻恭想宸衷寢膳不忘然邇安則可以服遠若大臣未附百姓不信而遽爲此舉安保其必勝浚老臣慮宜及此而溺於幕下新進之謀眩於北人誑惑之語是以有請耳德壽豈無報敵之心時張韓劉岳各擁大兵皆西北勇士燕薊良馬猶不能進今欲以顯忠之輕率宏淵之寡謀而取全勝可乎惟當練士卒脩器械固邊圉蓄財賦寬民力十年而後用之浚又奏歸正人當優待之公以

爲不可浚康伯俱曰彼以善心至安可拒乎公又兩人奏言甚切至公又與浚言平時願執鞭而不可得幸同事任而數日議論不同不惟爲社稷生靈計亦爲相公計相公老成名望一旦失利豈不有損威重浚曰公言良是但浚老矣公曰相公若先立規模使後人藉是有成亦相公之功也何必身自爲之浚因內引奏曰史浩意不可回恐失機會乞出英斷即時省中忽得宏淵出兵知稟狀始知不由三省徑檄諸將公語康伯曰吾屬俱兼右府而出兵不得與聞則

焉用相哉由是求去不已孝宗曰何苦如是公對曰道德元老無如陳康伯忠義慷慨無如張浚臣與之議論俱不合諸將出兵而臣不知近習積憾而臣不去尚何待乎公又言康伯欲納歸正人臣恐他日必有爲陛下子孫之憂浚銳意用兵若一失之後恐陛下終不得復望中原臣即日去國遂遠清光然惓惓之忠不容緘默言訖拜辭而退遂以觀文殿大學士知紹興府公力辭提舉臨安府洞霄宮以歸未及月而宿水失利喪士馬甚衆軍資器械不可計人心沮喪

上降詔罪已而浚亦自劾去位矣初浚措置萬弩營及他所建請公應之如響或問之公曰事力未備故止其進兵若邊防捍禦安可不從公既去其所奏請多不以時報浚亦悔之行狀○乾

道四年二月輔臣進呈陳天麟知成都府昨日得旨別擇人上曰朕思之難得其人史浩却有才可以去陳俊卿奏其人明了極可用但其親老恐未必樂遠去上曰不得已須教去蓋難得人數年不相見亦未衰否俊卿奏史浩未滿六十可惜又問上曰可令速來奏事陳天麟依舊

知襄陽府史浩遂以觀文殿大學士左通奉大  
夫提舉洞霄宮爲四川安撫制置使兼知成都  
府以親老辭月餘改知紹興府六年三月戊寅  
授檢校少傅保寧軍節度使依前差遣其恩數  
並依前宰相例施行會洪夫人屬疾思歸力丐  
祠不允乃許謁告迎侍未幾罹內艱○乾道八  
年九月七日服闋除知福州避魏王同鎮改崇  
信軍節度使十一月二十五日特授開府議同  
三司判福州至淳熙元年秋丐祠提舉洞霄宮  
○淳熙四年二月史浩除少保觀文殿大學士

克醴泉觀使兼侍讀進封永國公浩見于內殿  
奏謝新除并陳衰老多病且乞任便居住上曰  
方始相見未可言此於是詔史浩令於宰相東  
壁一片歇空立班四叅日叅依次序別班起居

丁未辛次膺叅知政事

自同知樞密院事除

洪遵同知樞密院事

自翰林學士承旨知制誥兼侍讀遷左中大夫除

癸亥汪澈罷叅知政事

資政殿大學士提舉洞霄宮

澈自紹興三十二年四月除叅知政事是年五  
月罷執政一年餘上初即位除左通議大夫七  
月以叅知政事汪澈爲湖北京西路督視軍馬

至是引疾乞祠故有是命會右諫議大夫王大寶論澈詔澈落職依舊提舉洞霄宮台州居住  
六月戊辰周葵叅知政事自兵部侍郎兼侍講遷左太中大夫除二年七月已

已兼權知樞密院事

戊寅辛次膺罷叅知政事除資政殿學士提舉臨安府洞霄宮

次膺自是年三月除同知樞密院事五月除叅知政事是月罷執政凡三月次膺以疾求罷章十數上不允及入謝奏曰王十朋除侍御史雖自親擢天下皆知臣等薦其方正湯思退趨召將至闕下天下亦知臣嘗疏其姦邪臣不引避

入其謂何臣實苦筋力疲憊恐誤國事上為之惻然踰月求去不已授資政殿學士提舉洞霄宮明年六月致仕間居者八年六年卒臨終親作遺表萬言力贊恢復而不及私年七十九贈光祿大夫

七月庚寅湯思退拜右相自觀文殿大學士左金紫光祿大夫充醴泉觀使兼

侍讀除特進右僕射同平章事兼樞密使進封榮國公

制曰熙庶績而代天須弼疑之並置肩一心而事國乃揆牧之迭居眷時宗工久去宰路方虛位之不補  
亶維賢之是圖肆於來歸渙以大號具官湯思退宏寬而



剛毅端靖而疏通學深造於聖微識洞明於事變卓爾佐王之略偉發謨而逢辰煥然經世之文嘉載道以行遠爰結知於太上遂登冠於冢司辭色粹夷潛消中外之釁精誠孚達坐格陰陽之和願委任而責成念勤勞而均逸欲考功而試以馮翊尚施福而及於京師自朕纂臨尤先求舊君陳分正固多人告之謀猷姬旦於征宜備往迎之衮綉是用賜環趣召前席咨詢少紆真館之游姑進露門之讀然所爲親賢之急蓋倚以復相之懷是符中台俾職亞輔仍付本兵之寄載崇馭貴之階建於上公陪以多賦併昭眷

渥庸侈徽章於戲如晦至卒從元齡將協衷而相濟

陳平今願遜周勃適居次以何嫌往殫厥心同底于

治錢周材詞

十二月丁巳朔陳康伯罷相

除少保觀文殿大學士判信州進封福國公

制曰輔相股肱於元首身久佩於安危帝王體貌於

大臣誼必隆於進退眷我家司之老懇辭魁柄之榮

既莫遂於挽留宜有加於寵秩肆盼明命誕告治朝

具官陳康伯

學貫天人才周經緯中和自稟言有物而行

有常度量難名澄不清而撓不濁爰登揆路五閱歲華當國家多事之時專廟廊萬微之寄雍容鎮俗談

笑折衝道蕩蕩以遵王無有作惡心休休而樂善其  
如有容邦政弗愆物情交附惟予一人纂承之慶本  
太上皇付託之誠能將順以輸忠實贊襄之有助心  
如金石勲在旂常朕方委任而責成爾亦勤勞而匪  
懈久煩機務累抗封章丁寧諭旨而莫回偃倭陳詞  
而愈固式揚典冊俾解鈞衡亞保升華煥衮衣於左  
棘鴻儒列職冠書殿於西清進公社於新邦分使符  
於故里載疇井邑併衍圭臬於戲功名克保於始終  
古今所重出處暫均於勞逸中外何殊其思注意之  
深勿替告猷之舊

康伯自紹興二十九年九月拜右僕射三十一  
年三月拜左僕射三十二年十二月兼樞密使  
是年十二月罷在相位四年至是出判信州上

曰韓琦亦曾判相州康伯極有德量有佐命之

功右僕射湯思退奏陳康伯德量能鎮壓事誠如聖諭上曰朕不忘之他日復召用康伯尋

自陳遂爲醴泉觀使隆興二年六月判紹興府  
九月詔陳康伯依舊醴泉觀使任便居住先是  
召赴行在康伯以疾辭故也

丁丑湯思退左僕射自特進右僕射榮國公授左僕射兼樞密使進封慶國公

張浚右僕射自降授特進樞密使魏國公授右僕射同平章事兼樞密使依前都督江淮東

西路建康鎮江府江陰軍江池州屯駐軍馬

思退左僕射制曰握符以臨四海論相故必惟其能  
 當軸而長百僚尊君則宜正其體眷予碩輔載秉化  
 鈞顧左揆之仍虛亶具瞻之攸屬矧登崇之典自昔  
 且注倚之懷愈隆用升元台寔允衆聽具官湯風猷  
 峻茂器範深純鍾山岳之炳靈蘊星辰之精粹力堪  
 治劇幹旋之易若轉圜識洞微幾裁決之明如指掌  
 蚤出逢於休旦爰歷踐於要塗久勤機務之煩遂冠  
 冢司之重雖或均於勞逸然常係於安危才任宰衡  
 猶詳試其政事心存王室乃入告於謀猷是膺前席

之思俄被賜環之趣繫樊侯之補袞若伊尹之格天  
 庶周歎儀圖之難而商推專美之間其進持於魁柄  
 以觀獨運之能且改胙於名邦以示有加之寵乘茲  
 會遇寢格隆昌於戲奏位次而莫先雅欲肖何之處  
 乎上咸成功而匪懈正須姬旦之圖其終徃茂堅不  
 息之誠庸光輔日新之治究爾丕烈佐予宏規

二年正月上謂思退等曰卿等近日極留意政  
 事要當立紀綱正法度不可困於文書乃堂吏  
 之事二月思退改封岐國公以思退言國朝自  
 天聖以來無以慶國為封者故有是命二年九

月癸卯除都督江淮東西路建康鎮江府江陰  
 軍江池州屯駐軍馬恩退言臣備位宰相被命  
 督師敵人雖已議和奉使尚未過界況屯邊之  
 兵數十百萬霜寒暴露臣欲擇日同屬官起發  
 至淮上布宣德意撫勞師徒從之卒辭不行  
 浚右僕射制曰總營屯而靖難既顯暢於國威輔衡  
 軸而代工將共調於王化朕纂承丕緒宏濟多虞眷  
 夫夙艾之良寔乃倚毗之舊蓋以一時之元老而久  
 服屨於疆場因四海之具瞻而使歸翊於岩廊庸錫  
 徽章誕敷渙號具官張俊德醇而履正道大而慮周身當

中外之安危識洞古今之治亂更委二柄備殫百為  
 雇讒波之滔天維忠氣之貫日吾適不用則鄰壤有  
 輕秦之心我必能興蓋所懷維強楚之略茲往嚴於  
 師律遂遐憺於皇靈挫狹獠之噬吞破虺蠹之贅聚  
 陰杜窺邊之釁寢堅款塞之誠念功烈之未終猶稽  
 素志觀規摹之甚遠實肇宏圖是用復延登於宰庭  
 仍總督於軍壘若涉於川之籍舟楫若固其室之資  
 棟楹勢雖異宜意則兼注於戲酌倅樽以獻政須平  
 仲之在齊借前箸而籌終賴子房之謀漢未鞭笞於  
 排難解紛之日而填撫乃安民和衆之方尚思厥猷

系金  
期協於道

錢周材詞

虜都元帥僕散忠義與紇石烈士寧貽書三

省密院欲索四郡及歲幣等時湯思退為右相  
思退本檜死黨尤急於求和遂大倡和議建議  
王之望龍大淵為通問使副公在遠爭不能得  
即奏乞退上賜手書召公既至入見上首諭公  
以欲專委之意公復力陳和議之失上為止誓  
書留使人而令通書官胡昉楊由義先往諭虜  
使以四郡不可割之意於是之望等待命境上  
○十二月二十二日制拜公尚書右僕射都督

如故而思退亦轉左僕射

云

上諭當直學士

錢周材以注意在公故思退雖為左僕射而公

恩遇獨隆每奏事上輒留公與語又時召樾入

對賜公御書聖主得賢臣頌思退等素忌公至

是益甚公既入輔首奏當旁招仁賢共濟國事

上令公條具奏公

薦虞

允文陳俊卿汪應辰王十

朋張闡可備執政劉珙王大寶杜莘老宜即召

還胡銓可備風憲張孝祥可付事任馮時行任

蓋言馮方皆可備近臣朝士中林栗王柅莫冲

張宋卿議論據正可任臺諫皆一時選也公自

太上時卽建議當駐蹕建康以圖恢復上初卽位公入對又首言之及撫師江淮每申前說至是復力言於上胡昉等還不爲虜屈上令拭諭公曰和議之不成天也自此事當歸一矣始議以四月進幸建康公又奏當詔之望等還上批出曰王之望龍大淵并一行禮物竝回○先是公旣決幸建康之議思退等初不與聞後奏事語屢屈因請曰和議不成虜至何以待之上曰朕已決幸建康思退等失色遂陰與其黨謀爲傾陷之計居數日俄有旨命公按視江淮公知

一日出外姦人必得肆音心然趣行之旨屢下而事之成敗有非人力所能爲者乃行

隆興二年

甲申

四月丁丑張浚罷右僕射

授少師保信軍節度使判福州依前魏國公

制曰宅百揆而督五兵正賴筭壽邊之効冠三狐而張

六纛曲隆制閫之權我有明綰賜於拱著

具官材尊張浚材尊

王佐道聳民瞻節操堅剛曾歲寒之不改規模遠大

寧日仄而遂休蚤逢陽九之交上應魁三之象叱王

尊之馭巨井絡以蜚聲下楊僕之舡空潢池而掃禳

更險夷而一致謂文武之兼資粵從綠野之遊殆爲

蒼生而起肆予嗣服卽俾來朝提江淮表裏之封盡  
顯總統佩將相安危之寄式重倚毗三年於茲庶績  
用乂蒐乘補卒亦旣輸勞增埤浚隍未嘗徹警言孟明  
報彭衙之役獨負壯猷武侯引街亭之愆靡形愠色  
朕念疆垂之久戎詔師衆以代更分遣從臣往宣使  
指棘門如兒戲耳庸謹秋防袞衣以公歸兮庶聞辰  
告壘覽指瑕之奏且披請老之章欲畀舊官蓋無故  
事是用出楓宸之異渥超棘位之崑班蕩節有光擇  
合肥之名鎮甘棠弗翦臨長樂之价藩衍以圭腴侈  
其真食於戲春秋責備於賢者慨功業之惟艱天子

加禮於大臣固始終之不替其綬吉履毋有遐心

浚自隆興元年十二月拜右僕射兼樞密使是

年四月罷再入相纔五月○初上命公按視江

淮旣出國門思退遂與右正言尹穡通謀日夜

汲汲益求所以間公者及之望等還思退等因

相與陰謀謂不毀守備則公不可去和不可成

乃令其黨盛毀守備一無可恃而穡專主其議

百計毀公督府叅議官馮方徧行兩淮築治城

壘最爲勞勩思退等以其効力尤多尤惡之使

穡論方不當築城費財方遂罷又論公所費國

用不貲公奏計督府遣間探給官吏等二年半之費不及三十萬緡其餘皆爲修城造舟除器招軍用上出公奏思退稽議屈於是始謀更造他事機撼公殿前後軍統制官張深等有勞軍士安之俄有旨放罷而以趙密之子廓代之公至淮西訪問知狀奏留深而稽指公爲拒命跋扈思退又相與謀上眷公厚必未肯遽罷公但先罷公都督則公自當引去稽奏論如思退計而公自聞馮方罷上奏乞罷督府詔從公請而公亦封章力求還政矣稽連疏詆公愈力左司

諫陳良翰奏如公忠勤人望所屬不當使去國上謂良翰本無此事且當今人材孰有踰魏公者卿宜徧諭侍從臺諫使知朕此意侍御史周操疏同良翰議至是爭論甚力然是時公留平江虎丘致政之章已八上矣上察公懇誠欲全其去四月二十二日制除公少師保信軍節度使判福州而思退等遂決棄地求和之議公力辭恩命上不許至五月除醴泉觀使

前雖議四月幸建康

至是而公已去國矣公以連年疲勞比得退休已覺衰爾八月二十八日疾病晡時命子棫等坐前問國



家得無棄四郡乎且命作奏乞致仕夜分而薨  
訃聞上震悼輟視朝兩日有旨贈太傅公歿五  
年上追思公忠烈慨然感動詔有司加贈太師  
賜諡忠獻狀行○浚自幼卽有濟時志在京城  
親見二帝北狩皇族係虜生民塗炭誓不與賊  
俱存故終身不主和戎之議功雖不就人稱其  
忠論事上前必以人君當正心務學修德畏天  
至誠無倦爲先又以儲副爲天下本自在川陝  
卽上疏乞選養宗室之賢及爲相復陳宗廟大  
計登善堂建皇子出就傅又薦朱震范冲充訓

道之選每以東南形勢莫重建康人主居之北  
望中原常懷憤惕若居錢塘易以安肆難以號  
召中原故自紹興至隆興屢以遷幸爲言稟性  
至公嘗劾李綱以私意殺從臣宋齊愈罷其政  
及大赦綱貶海外獨不原浚爲請得內徙韓世  
忠軍士剽掠浚嘗奏奪其觀察使及視師淮上  
獨稱世忠忠勇可倚以大事兄滉以才學爲高  
宗所知賜進士第後省繳駁浚言不可以臣故  
違公議其輔政以人才爲急與趙鼎當國多所  
引擢從臣朝列皆一時之望人號爲小元祐至

隆興初首薦論事切直折挫不撓者數十人及再相又薦虞允文汪應辰王十朋劉珙等皆一時名士其後多至執政侍從尤善於撫御將帥而知其才始在關陝吳玠吳玘由行間識擢卒有大功於蜀劉錡晚出浚一見奇之卽付以事任歸薦於朝卒成順昌之奇功高宗嘆息謂浚知人其他若楊政田晟王宗尹王彥後皆爲名將事母至孝彗星之見浚將論時事恐爲母憂其母見浚瘠問故具以告母誦其父對策之語曰臣寧言而死於斧鉞不忍不言以負陛下浚

意乃決母喪浚踰六十哀毀不自勝事兄滉友弟尤至教養其子如己子置義莊以贍宗族○淳熙十五年二月高宗崩輔臣進呈文字間上宣諭王淮等曰臣僚言張浚有復辟之功卿等可檢照史冊并詢訪事實奏來淮等奏羣臣有以張浚爲當配饗高宗廟庭者上曰張浚首失五路符離敗師踈脫不少又且昧於知人初到關時薦引蜀士及至召對專事諂諛殊無可采如呂祉覆師亦皆不知人之過却是有志若論復辟韓世忠之功顯然可知者後遂以呂頤

浩趙鼎韓世忠張俊竝配饗高皇帝廟庭

七月丁亥洪遵罷同知樞密院事

自左中大夫為端明殿學士提舉太

平興國宮

遵自隆興元年五月除同知樞密院事是年七月罷在樞府一年餘

八月己酉賀允中知樞密院事兼參知政事

自資政殿大學

士左通議大夫提舉萬壽觀兼侍讀除

是年六月允中落致仕提舉萬壽觀兼侍讀慮其以年老辭令學士院依故事降詔召赴闕是月遂有此除九月允中以開啓會慶聖節拈香拜不能起至於顛仆上章自劾詔曰朕方圖治政賴老成豈以筋力責卿何必自劾十月丁卯除資政殿大學士致仕在樞府兩月

九月辛丑王之望參知政事

自左諫議大夫淮西宣諭使遷左中大夫除

之望字瞻叔襄陽谷城人紹興三年官于台因家焉持節入蜀徧歷外臺以王官總軍賦孝宗卽位之望出使九年矣官至太府卿而難其代詔特增置戶部侍郎陞宣諭使留之於蜀及還朝仍以戶部侍郎參贊都督府初見上開陳時事上大喜有大用意遂自左諫議大夫淮西

宣諭使拜參知政事中使李彥直至建康宣押  
賜之宸翰有謀皆朕同規摹甚遠之語尋入朝  
上慰勞甚至之望曰執政自外除國朝曠典慶  
曆中韓琦范仲淹立功西鄙就除樞副亦未有  
自諫議大夫而爲參預者上曰稍定待與卿理  
會天下事俄兼同知樞密院事尋差充督視又  
改除同都督江淮軍馬先是左相湯思退爲都  
督楊存中爲同都督又以之望爲之之望奏用  
宰相爲都督者本欲事權歸一也今思退開府  
兩月忽一旦改命則思退固自難處存中旣已

一面措置而又添一同都督則存中又不敢專  
存中官爲三師臣備員二府權勢相敵不能相  
統議論之際誰敢相發相異則或至紛爭相推  
則有失事機使諸將何所稟承上乃可其奏時  
虜人在滁濠間淮東受敵之望乃自請行遂以  
參政行府勞師江淮述行○十月己巳兼同知樞  
密院事之望辭免兼同知詔樞機之任藉卿同  
德以濟國事毋復固辭之望乞往江上勞師從  
之

十一月辛卯湯思退罷左僕射

授觀文殿大學士提舉太平興國宮依前

時進岐國公  
任便居住

制曰冢宰佐王治國意實注於安危大臣以道事君

時具瞻於進退睠惟雅望父翊繁機既殫上印之

誠宜厚秉鈞之禮誕敷垣制宣告羣工具官湯器字  
思退

清明材猷超詣樂堯舜之道阿衡專美於有商品淵

騫之篇揚雄度越於諸子軒然俊域藉甚要津烜赫

北門擬絲綸於雅誥從容右府運帷幄之良籌結慈

陛之深知應台階之上象粵予纂紹復俾替襄積熙

載之忠規罄安邊之潛慮循名責實所期公爾忘私

應變守文當以今而視昔方仰成之無間何引去之

甚堅選衆舉臯陶任蓋遵於一相事親若曾子養已

泊於千鍾遂其嘗藥之懷失我和羹之助茲惟渥典

用賁歸途鼎祕殿之崇資食珍臺之優祿式篤股肱

之義以全體貌之恩於戲明哲以保其身靡失青氈

之舊喜慍不形於色可娛綠野之游無起遐心斯能

終譽

思退自隆興元年七月拜右僕射十二月拜左

僕射至是年十一月罷入相一年餘○右諫議

大夫尹穡侍御史晁公武言比因敵人聚兵境

上首除湯思退都督而思退作計遷延屢行屢

止及詔旨促發度不能辭力於奏對之際佯為  
戰灼畏懼之狀以幸終免陛下知其不能任事  
憐而從之許其解職思退不得已即乞罷政陛  
下未忍誅竄且除職奉祠云又言思退急欲  
和好之成自壞邊備罷築壽春城散萬弩營兵  
輟修海舡毀拆水櫃不推軍功賞典及撤海泗  
唐鄧之戍又於制詞中明言我守邊如兒戲使  
虜人知之既報敵兵渡淮思退領都督之職專  
為全軀保妻子之計巧求自便其姦狡大率効  
法秦檜既獨領三省又置機速兵籍兩房盡奪

樞密院事合四職為一與猾胥老吏輩共為之  
內不使官屬參預外不使臺諫知聞是致嘲謗  
溢於市廛笑侮流於軍伍詔思退落職鐫爵未  
州居住是月處州奏特進湯思退歸至處州界  
在靈山寺身故詔令歸葬初封榮慶後封岐

戊戌陳康伯左僕射自少保觀文殿大學士充醴泉觀使福國公拜左僕射同平章

事兼樞密使依前少保進封魯國公再入相

制曰咨四岳有能奮庸實係朝廷之輕重圖舊人越  
惟共政允藉老成之典刑允諧虛左之求蓋積處中  
之望誕颺渙冊曾告昕庭具官陳康伯用博而適時量宏

而容物闡奧莫窺乎畛域奴隸皆知其清明學過況  
雄貫古今之千載道侔伊呂踰前後之數公咸德慈  
闡有聲揆路如著龜之決事以柱石而尊朝胡騎投  
鞭軫抱火寢薪之慮周京奠枕賴濟川作楫之功輔  
我重華歷夫再歲轉洪鈞之一氣塊札無私陳泰階  
之六符規摹可久方焦心多壘之日豈袖手東山之  
年申戒使輶趣迎公袞庶交修於內治能潛弭於外  
虞眵畝不忘其君庸見忠臣之義彌縫而藏諸用益  
躋天下之安是用再冠冠衡仍司樞筦侈多田之真  
賦荒大國之新封以昭物采之儀以寵岩廊之寄於

戲武丁得一傳說斯商道之復興江左自有夷吾宜

晉人之相慶爾惟敬明乃訓邦其永孚于休

洪适詞

康伯再召拜尚書左僕射時康伯已病康伯之

未至也太學生數百人伏闕下上書乞召用康

伯聞之不樂曰國家艱危主上英武當得非常

之佐顧老且病何用乎康伯既至而北師退○

先是臣僚言相位久虛詔陳康伯疾速星夜兼

程前來又詔令不候辭免降詔批荅指揮既至

內殿起居畢上殿賜坐賜茶詔權令乘肩輿出

入皇城門至殿前外又詔康伯餘疾未平可隔

日一朝每日赴都堂治事詔監修國史提舉編類聖政又詔陳康伯長男偉節為直祕閣次男安節依慶曆宰相龐藉子元英例特賜同進士出身乾道元年正月庚申康伯抗章引疾且以比使到闕乞辭位詔曰朕方倚卿為重遽復引疾巧去似未諭眷懷雖鄰使在廷何傷體貌宜加嗇養勿復有陳

辛丑錢端禮端明殿學士簽書樞密院事

自兵部尚書賜同進

士出身提舉德壽宮尋權參知政事

壬寅虞允文端明殿學士簽書樞密院事

自顯謨閣學士知平

江府召除尋兼權參知政事

允文字彬甫蜀僊井人

閏十一月丙辰周葵罷參知政事

除資政殿學士提舉臨安府洞霄宮

癸自隆興元年六月除參知政事是月罷執政

踰一年乾道六年三月以左中大夫資政殿學

士致仕

乙亥王之望罷參知政事

自左中大夫罷為端明殿學士提舉太平興國宮

之望自是年九月除參知政事是月罷在政府

甫兩月之望既拜參貳兼行右府時和戰未決

衆論不齊遂除職奉祠而去乾道元年四月起



知福州為帥四年尋加資政殿大學士改知溫州七年二月乙卯致仕上為輟朝贈宣

十二月辛卯錢端禮參知政事兼權知樞密院事自

書樞密院事除

乾道元年正月自右通議大夫兼提舉德壽宮

除兼充德壽宮使

同日虞允文同知樞密院事兼權參知政事自左朝請大夫

簽書樞密院事除

王剛中端明殿學士簽書樞密院事自禮部尚書除

乾道元年乙酉

二月戊申陳康伯罷左僕射授少師觀文殿大學士曾國公致仕

制曰大臣國之股肱允係朝廷之輕重賢相民之師

表允觀功業之始終睠時宗工實總魁柄方共熙於

天緯遽祈解於政機誕敷綸綍之公庸肅紳綉之聽

具官陳康伯直方而不撓敦大而有容學洞九流多見聞

而守以約卓德尊一代極高明而道乎中庸膺兩朝

眷注之求積四載經緯之業任重力踰於柱石決疑

謀審於蒼龜澤潤生民勳在王室自釋鈞衡之寄舉

思袞綉之歸屬外治於邊虞適內虛於相位強起弼

諧之老庶臻嘉靖之期魯用仲尼宜盡復汶陽之舊

晉登王導顧何憂江左之危肆上天儲悔禍之休俾  
中國有弭兵之慶方修自治之策以啓非常之元朕  
茲垂拱以仰成公乃逡巡而避寵雖君臣一體之相  
待惟疾之憂念神明異物之所扶何恙不已矧方膺  
於書接尚入告於辰猷觀應對進退之間靡纖芥毫  
釐之失豈意乞身之請略無移晷之淹諒難奪於忱  
辭爰曲從於雅志進位孤卿之冠旣侈殊恩通班書  
殿之崇更昭隆眷仍陪并賦之入以爲里居之榮於  
戲得賢立邦家之基固未忘於注倚閔勞以官職之  
事姑俾遂於燕申往服寵章永綏福履

將蒞  
詞

康伯自隆興二年十一月拜左僕射乾道元年  
二月致仕再入相凡三月是月二十八日入對  
退○殿門喘劇輿至第薨詔陳康伯薨於位理  
宜優異仍令入內內侍省押班賈竝主管敕葬  
薨時年六十九上輟朝三日官其親屬十一人  
御書旌忠顯德之碑表其墓康伯爲表章疏議  
溫厚典雅而理致明白旣薨鎖院降麻以少師  
觀文殿大學士致仕上遣近侍諭當制學士曰  
陳康伯比奏對無一語差當載之制中制所謂  
應對進退之間靡纖芥毫釐之失者述上旨也

慶元初以康伯配享孝宗廟庭其孫將作監景  
參援文彥博例請改諡詔改諡文正初封信福後封魯先

諡文恭

三月庚申虞允文參知政事兼同知樞密院事自同知樞

密院事除

其在西府皆權參政遂為真猶兼樞密院

王剛中同知樞密院事自簽書樞密院事遷左中大夫除

六月癸未以左太中大夫致仕戊子○王剛中

薨輟視朝贈左銀青光祿大夫資政殿大學士

賜諡恭簡

四月丙戌洪适端明殿學士簽書樞密院事自翰林學士左

中奉大夫知制誥除

适字景伯饒州鄱陽人忠宣公皓長子也與弟

遵同中博學宏詞科上諭參政錢端禮虞允文

曰三省事與洪适商量東西府始同班奏事

八月己丑虞允文罷參知政事除端明殿學士提舉江州太平興國宮

允文自隆興二年十一月除同簽書樞密院事

十二月除同知樞密院事是年三月除參知政

事是月罷執政凡九月

同日洪适參知政事自簽書樞密院事除

是月癸巳兼權知樞密院事九月甲戌兼同知

樞密院事

葉顥端明殿學士簽書樞密院事自吏部侍郎權尚書除是月癸巳兼

權參知政事

丙申錢端禮罷參知政事除資政殿大學士提舉萬壽觀

端禮自隆興二年十一月除簽書樞密院事上

二月除參知政事是年八月罷執政凡九月乾

道四年八月知寧國府後又知紹興府淳熙元

年四月加觀文殿學士尋落觀文改資政與祠

四年二月詔資政殿學士通奉大夫提舉洞霄

宮錢端禮為資政殿大學士以會赦也八月詔

端禮復觀文殿學士致仕十月贈銀青光祿大

夫

九月甲戌汪澈知樞密院事自端明殿學士除

十月戊寅洪适右僕射自參知政事除左通奉大夫守右僕射兼樞密使

制曰得賢而立邦基尤重秉鈞之任奮庸而熙帝載

宜先注意之求朕稽古以建百官好要而論一相天

其為生良佐底乂我家予惟灼見俊心俾輔台德爰

繹岩瞻之素用符師錫之公有眾在廷無諱聽命具官

洪高明而敦裕篤實而清通與學測於聖幾英識周

乎物表稟資直諒未嘗吐剛而茹柔抗論崇竝無不  
會文而切理揚於中外之久昭哉望實之孚視草禁  
林訓辭鼓天下之動本兵樞筭籌策運幄中之良暨  
秉執於政幾彌參穆於王度總衆職以稱朕意熙庶  
績以亮天功守彝憲而公正之道開杜請託而僥倖  
之門塞天休昭格炳泰階六符之輝國勢尊安增大  
呂九鼎之重是用升亞辯章之貴仍顯宥密之權增  
峻文階申加多賦予欲修法度於頽靡之後爾其力  
振於綱維予欲用賞罰於姑息之時爾必大明於黜  
陟毋獨阿於親舊期公選於賢能毋朋比而徇私毋

依違而患失毋取充位必旣厥心毋思容身必任其  
責於戲成湯受命時則有伊尹格於皇天周室中興  
王命仲山甫式是百辟予欲追蹤於治古爾其儷美  
於昔人惟勵乃誠以若予訓蔣芾詞

同日汪澈樞密使

自左通議大夫知樞密院除

制曰建輔臣以成天功共政必先於求舊有常德以  
立武事本兵尤賴於得人乃睠儒英夙隆公望念久  
顛於戎柄宜寵陟於使名敷告治朝誕敷顯冊具官汪澈  
器博而用遠實茂而聲宏備九德之忱恂養一氣以  
剛大有馳聘古今之學期於致主而澤民有經緯文

武之才見之附衆而威敵蚤受知於慈宸爰服采於  
從班執法中司綱紀正一臺之治總戎外閩精神折  
千里之衝參筦國成奮熙帝載夷險百爲之備歷始  
終一節以不渝比念秉鈞之良起司留鑰之重儀圖  
舊弼進長元樞橐弓矢而戢干戈雖篤鄰封之好繕  
甲兵而補卒乘不忘邊備之修紀律設張謀謨宏遠  
載嘉乃績實契朕心是用峻升宥地之崇增重政塗  
之寄胙之侯爵衍以戶租於戲進有德則朝廷尊朕  
旣精於籲俊用真賢而天下治爾尚勉於告猷思同  
寅而協恭期定功而保大欽予時命惟乃之休蔣黃詞

庚寅葉顥參知政事兼同知樞密院事

自簽書樞密院事除

乾道二年

丙戌

三月辛未洪适罷右僕射

授觀文殿學士提舉江州太平興國宮

制曰輔相任股肱之寄身常係於重輕帝王隆體貌  
之恩義必全於終始睠惟端揆茲解繁機爰敷制綽  
之嚴用冒廷紳之衆具官洪适性資雋敏心術通明智略  
湊前綽有論思之美辭章華國形乎播告之修自密  
簡於朕知幾立登於要路亟升樞筦旋秉國成方本  
朝循名責實之秋蓋大臣同心輔政之日奮庸熙載  
獨膺亮采之求當軸處中正倚調元之助何未凝於

懿績遽有噴於煩言既簡劾之荐聞亦曩封之屢責  
 是用釋鈞衡之重任仍休宥密之繁通書殿之崇班  
 俾遂真祠之佚式遵彝矩庸表殊私於戲后德惟臣  
 不德惟臣朕敢輕於注意進人以禮退人以禮爾宜  
 體於眷懷思勉令猷往祇明命蔣芾詞

適自乾道元年十二月拜右僕射二年三月罷  
 入相凡三月臣寮論其欺君撓法盜權蠹國之  
 罪乞罷其相位不行復又數其六罪有旨報行  
 春霖適引咎乞退諫議大夫林安宅抗疏論適  
 既而臺臣復合辭以奏三月除適觀文殿大學

士提舉太平興國宮數月起知紹興府閱歲有  
 半再奉祠蓋家居十有六年薨淳熙十一年二  
 月贈觀文殿大學士正議大夫致仕洪適為特  
 進

癸酉魏杞同知樞密院事兼權參知政事自給事中權吏部尚

書除

四月乙未汪澈罷樞密院使自左通議大夫除觀文殿學士提舉臨安府洞

霄宮

澈自乾道元年九月除知樞密院事十二月拜  
 樞密使是年四月罷在樞府凡七月澈之奉祠

從所請也乾道四年八月自知寧國府改知福州七年十月除左通奉大夫致仕隆興二年閏十一月自提舉洞霄宮除端明殿學士知建康府尋卒贈金紫光祿大夫謚曰莊敏

五月庚戌葉顥罷參知政事除資政殿學士提舉洞霄宮

顥自乾道元年八月除簽書樞密院事十二月除參知政事是年五月罷執政凡九月臣僚論列顥亦自乞罷遂有此除○八月侍御史王伯庠以論葉顥章疏內指言顥姪元璘受周良臣請求贓事獄上無跡事于大臣風聞失實罷侍

御史詔葉顥可召赴行在

同日魏杞參知政事自知樞密院事除八月

林安宅同知樞密院事兼權參知政事自右諫議大夫除

辛亥蔣芾端明殿學士簽書樞密院事自中書舍人除八月戊

子兼權參知政事

芾字子禮常州人

八月丙戌林安宅罷同知樞密院事

安宅自是年五月除同知樞密院事兼權參知政事是月罷執政凡三月淳熙七年正月加端明殿學士中大夫致仕林安宅正奉大夫八年



卒年八十三

十二月戊寅葉顥知樞密院事

自資政殿學士左中大夫提舉洞霄宮除

顥內殿對畢宣坐賜茶詔除知樞密院事

甲申葉顥左僕射

自新除知樞密院事除左通奉大夫左僕射同平章事兼樞密使

魏杞右僕射

自參知政事除左正議大夫右僕射同平章事兼樞密使

顥左僕射制曰大臣以道事君夙茂同寅之効人主

之職論相莫先求舊之圖疇咨秉哲之英起冠調元

之任靈辰協吉孚號揚庭

具官葉顥德博而智周器闕而

用遠學聖人之道探奧蹟於幾先高天下以聲埴貴

名於物表自際明昌之運旋躋輔拂之聯秉心惟合

於至公持論不牽於流俗國厚得賢之盛士興樂職

之風暮年於茲百度咸理補袞而命山甫方切注懷

投杼而疑曾參遽聞勇退朕宣昭名實審克是非既

從有比之投亟下東歸之召有欲為玉留者孰明去

就之忠無以我公歸兮大慰瞻儀之望再輸爾政未

猷予衷是用稽迪師虞延登上宰置使總樞機之重

茂官兼史策之清侯社疏封圭田衍食方今敵國雖

和而邊備當戒吏員已衆而官箴咸隳利用厚生力

未臻於善政聚人守位義最急於理財凡此數端賴

吾三事宜思心腹之寄委以茂股肱之始終於戲舜

協帝以重華舉臯陶而不仁者遠湯享天而一德臣  
伊尹故不勞而王尚惟老成無假訓告洪邁

祀右僕射制曰明王立政惟人職莫先於籲俊宰相

代天理物任尤切於奮庸肆疇參預之英亟正久虛

之位我有渙號揚於治庭具官魏祀博大而高明閱深而

肅

且因循之弊一心利國極彌縫輔贊之功政如衡石

之平衷靡絲毫之僞察其朴厚可付弼諧今敵國更

成青海不聞於傳箭黎民樂業潢池無復於弄兵汜

可小康徂維求定然以吏治尚煩於綜核邦財未覲

於阜蕃官益冗而不清兵雖多而可汰聿開公正之

路屬在丞疑之臣是用考協吉時延登次揆平章大

政既資朝夕之輔台典領中樞仍陪夙夜之基命秩

峻文階之敘侯通鄉社之封衍以圭腴錫之真賦併

厚股肱之寵以昭體貌之隆於戲宣帝中興魏相號

有聲之佐太宗致政鄭公多導諫之言其勉紹於祖

風以祇承於朕志洪邁詞

是月詔宰相兼制國用使參政同知國用事五

年二月罷

同日蔣芾參知政事自端明殿學士簽書樞密院事兼參知政事遷左中大夫除

陳俊卿同知樞密院事兼權參知政事

自左朝議大夫試吏部尚

書除

俊卿字應求興化人先是上猶未能屏鞠戲又將游獵白石俊卿時為吏書上疏力諫至引漢威靈唐敬穆及司馬相如之言以為戒後數日對上迎謂曰前日之奏備見忠謹朕決意用卿矣俊卿再拜謝上曰朕在藩邸已知卿為忠臣矣遂有是命

乾道三年

丁亥

二月辛巳虞允文知樞密院事

自端明殿學士提舉太平興國宮遷左太

中大夫除

允文見于內殿宣坐賜茶遂除知樞密院事會吳璘卒上謂允文曰今命宣撫使無以易卿其為朕一行六月除資政殿學士四川宣撫使上猶疑其權輕仍以知樞密院遣行稱樞密行府仍除左太中大夫

十一月癸酉葉顥罷左僕射

提舉太平興國宮

魏杞罷右僕射

提舉太平興國宮

顥罷相制曰熙帝載而宅百揆柄莫重於鼎臣代天工而曠庶官義難安於宰路乃眷弼諧之老比愆燮

理之宜爰卽昕廷誕揚免策具官葉顯秉心夷易制行簡  
 廉悃幅無華風采夙高於政事剛明有守聲徽遂壓  
 於楮紳藉其惇德而有容謂可協恭而圖任亟繇外  
 服擢冠中台豈其歲律之移寢嘒岩瞻之望雖勉奉  
 公之一意式乖經國之遠猷進英俊以強本朝罕聞  
 引類發德音而下明詔方佇責成馴于至日之和忽  
 駭冬雷之咎覩禳符之相盪顧遜牘以屢騰袞職已  
 虧輿言弗置聽解鈞樞之劇歸從祠館之游相亦用  
 終我惟祗誥於戲理陰陽而遂萬物所嘆論道之非  
 因災異而劾三公實召應天之媿尚虔威命毋怠省

循洪邁詞

杞罷相制曰朕勵精思又克已用賢天旣全付予有  
 家術莫先於更化我惟無斁其康事誼實賴於同寅  
 豈伊圖任之良浸爽具瞻之望粵其定令亶告在廷  
 才韞具官魏杞櫝而藏見謂逸羣之美器自席珍而待聘能宿  
 道以鄉方度越彝章超登鼎輔旣優游於廊廟茲在  
 苒於歲時陳治平之原殆乏嘉謀嘉猷之告后開英  
 俊之路或非常伯常任之準人繫職業之徒勞致青  
 災之謫見當雷在地中之候駭令興離治之祥咎證

不虛師虞未馱壘覽告歸之請願從策免之科優以奉祠聽其釋位於戲持國之柄為將相所期熙載之功勅天之命惟時幾敢追動威之懼尚全素履以稱明恩

二相之罷竝以郊祀雷變故也○乾道八年正月詔觀文殿學士左宣奉大夫提舉洞霄宮魏杞落觀文殿學士以信任賊吏前任平江府簽判管鈞故也十年十一月詔端明殿學士魏杞復資政殿大學士致仕從其請也

同日陳俊卿參知政事自同知樞密院事兼權參知政事除

劉珙同知樞密院事自翰林學士知制誥除○四年七月壬戌兼參知政事

珙字共父建寧人子羽之子也

乾道四年戊子

二月蔣芾右僕射自參知政事除左正議大夫守右僕射兼樞密使

制曰皇天眷求一德實右序於我家丞相助理萬機盍登崇於王佐有若爽邦之哲時為命世之才肆顯拜於中台用允釐於衆職咨爾在列服予成言具官蔣芾

篤實而疏通高明而警敏學足以傳聖人之道智足以決天下之疑蚤以英聲儀於要路慮無遺策每加造膝之言誼不顧私獨盡匪躬之節自贊襄於大政

益奮發於壯猷指前事之不然力圖改作建宏摹而特起自詭必成憂邊思職而預備不虞選賢與能而漸開公道朕方相時而變化愛日而即功謂柱石之臣當計安於社稷而廟堂之任非徒守於簿書奉法循理者未足以有為善謀能斷者乃堪於大用爰稽人望擢秉國鈞領樞廷宥密之司兼史筆鋪張之寄徹土田於公社峻品秩於文階疏寵甚優責成深重於戲朕欲役使羣動爾則謹號令之行朕欲照臨百官爾則當賞刑之用上燮調於元氣下綏靜於生民以能立太平之基其克有無窮之聞莫濟詞

己巳王炎端明殿學士簽書樞密院事自右朝奉大夫試兵部侍郎賜同進士出身除

七月蔣芾罷右僕射以母喪去位

十月庚子起復拜左僕射同平章事兼樞密使

辭免依舊持服○淳熙二年臣寮論觀文殿大

學士蔣芾與王炎張說欺君之罪詔芾落觀文

殿大學士建昌軍居住七年正月以正議大夫

提舉洞霄宮九年六月詔以正奉大夫致仕從

其請也贈資政殿大學士

八月辛亥劉珙罷同知樞密院事知隆興府

系金 卷之十七  
珙自乾道三年十一月除同知樞密院事是年  
八月罷除端明殿學士在外宮觀未受復改是  
命遂自新除端明殿學士知隆興府乾道五年  
十月以資政殿學士左中大夫知荆南府尋丁  
母憂七年二月起復除同知樞密院事荆襄宣  
撫使辭免依舊持服九年閏正月珙自資政殿  
學士知潭州除資政殿大學士依舊知潭州淳  
熙元年除知建康府四年三月詔劉珙居守建  
康績効顯著可除觀文殿學士差遣如故五年  
七月以通議大夫致仕後贈光祿大夫珙薨上

爲輟朝諡曰忠肅○珙丁外艱明年起復同知  
樞密院事荆襄宣撫使遣中使奉璽書卽喪次  
宣押奏事其書曰朕以荆襄上流宿師尤重欲  
以軍民之寄付卿其任重矣奪情臨民國有常  
典況吾大臣又當體國毋以家事辭王事也公  
六上奏辭不肯起引經據禮辭甚切至最後言  
曰孝之與忠豈有二致事君事親初無兩心使  
親喪而可奪則他日所以事君者可知矣況陛  
下方以天下奉兩宮之驩而以衰經不祥之儀  
造迹二三大臣之間殆非所以全孝治之美且

使仇虜聞之亦必以中國乏材乃至於此而敢肆其輕侮此臣所以受恩感激反覆思慮而卒不敢起也

朱元晦作公行狀

○珙知潭州安撫湖南會

安南貢馴象所過發夫除道毀屋數路騷動奏曰象之用於郊祀不見於經驅而逐之則有若周公之典在且使吾中國之疲民困於遠夷之野獸豈仁聖之所忍為也哉○湖南李金叛珙既平之孝宗賜爾書曰近世書生但務清談經綸實才蓋未之見朕以是每有東晉之憂今卿既誅羣盜而功狀詳實諸將優劣破賊先後歷

歷可觀甚副朕意卿其益勉之哉賊地既定境內政清公乃喟然嘆曰吾豈樂殺人哉向者軍興令不可以不肅而今而後庶有以亮吾心矣自是一意於撫摩之政且為請於朝乞擇守宰寬賦歛以安吾民益廣蒐募以補忠義親兵之缺嚴紀律而時訓習焉於是湖南隱然為重鎮方地數千里外戶不閉商旅野宿焉○淳熙中孝宗皇帝顧輔臣圖議恢復珙奏曰復讎雪恥誠今日之先務然非內修政事有十年之功臣恐未易可動也同列有進而言者曰機會之來



間不容髮奈何拘此曠日彌久之計公曰宣王  
 中興見於詩者始則側身修行以格天心中則  
 任賢使能以修政事而已其終至於外攘夷狄  
 以復文武之境土則其積累之功非一旦率然  
 僥倖之所為也上以公言為然○珙疾亟草遺  
 奏千餘言首引恭顯佞文以為近習用事之戒  
 且言以腹心耳目寄之此曹故士大夫倚之以  
 媒其身將帥倚之以饑其軍牧守倚之以賊其  
 民朝綱以紊士氣以索民心以离咎皆在是願  
 亟加屏逐以幸天下若羣臣之賢臣所知者則

唯陳俊卿忠良確實可以任重致遠張栻學問  
 醇正可以拾遺補闕願陛下亟召用之則衆賢  
 彙進而羣小黜伏矣並行狀

十月庚子陳俊卿右僕射自參知政事除左正議大夫右僕射同平章事兼樞

密使

制曰得賢而立邦基允謂保民之要宅揆而熙帝載  
 莫如選衆之公廼眷大儒時惟舊德肆延登於次輔  
 用光啓於丕圖誕敷顯冊之言播告路朝之士具官陳俊卿  
 宏深而簡遠敦厚而純明學通六藝之文識照萬  
 微之會久周旋於中外益奮發於材猷更治民以考

綱年錄 卷之十七  
功屢服蕃宣之寄圖任人而共政其昭翼亮之忠特立宏摹不趨小利休休容善曾無媚忌之心蹇蹇匪躬克有堅剛之節朕方講明王道建置相臣謂舉偏補弊者要在必爲應變守文者固當竝命是用升鼎席辨章之任兼樞庭宥密之私總史籍以提綱胙公圭而啓宇哀加異數昭示至恩於戲相須成體者君臣之情罔不同心者丞弼之義以蕭相之規隨而率大卞以房社之謀斷而愜遠猷能求配於古人乃有辭於永世

時起復蔣芾爲左僕射以後卿爲右僕射芾辭

乞終喪從之○時禁中密旨直下諸軍者朝廷多不與聞有某官張方者以某事發覺俊卿方與同列奏請自今百司承受御筆處分事宜竝須申朝廷奏審方得施行未報至是因殿前指揮使王琪被旨按視兩淮城壁詐傳聖旨增築州城事復以爲言上乃悅而從之後兩日又有旨收還前命俊卿語同列曰反汗如此必關牒至內諸司有不樂者相與爲之耳卽具奏云云翌日面奏上色甚愠顧謂俊卿曰朕豈以小人之言而疑卿等耶劉珙進對語切忤上意旣退

御筆除珙端明殿學士在外宮觀俊卿即藏去  
密且奏明日復申前請上色悔久之又奏言珙  
正直有才願留之上曰業已行之不欲改也俊  
卿曰珙無罪而去當與大藩以全進退之禮上  
然之乃以珙為江西帥俊卿退又自劾章奏抵  
突被命稽留之罪手札留之俊卿請益堅上不  
許於是有意相俊卿矣不數日而有是命

乾道五年

巳

二月甲辰王炎參知政事兼同知樞密院事自端明殿學士

簽書樞密院事兼權參知政事除兼同知國用事

三月以左中大夫王炎為四川宣撫使依舊參  
知政事七年七月參知政事王炎授樞密使左

太中大夫依前四川宣撫使

制曰周公碩膚而四國是皇亦既久臨於井絡吉甫  
文武而萬邦為憲莫如就正於斗樞雖未賦三年之  
歸固宜先多祉之受我有渙號人其樂聞具官迪志  
高明賦材英傑負博古通今之學濟康時經遠之謀

臯陶之翼舜朝選雖以衆張良之從漢祖授或自天  
粵貳政於中臺即宣威於全蜀慮無遺策事不辭難  
和衆安民得懽心於將帥補軍蒐乘勵武節於邊疆

邦儲裕於塵坱國馬蕃於互市以其圭觀固深簡於  
朕懷無使袞歸復重違於人望何惜異數於昭壯猷  
二府分班左右幹鈞樞之柄太微占象東西齊將相  
之光按四品以升階度諸侯而賜爵載疇多邑併寵  
元戎匪時信臣孰對隆委於戲樞機之重中外所同  
西顧未寬則藉精神而折千里羣方庶定則還後

以強本朝往單厥心終濟予治

周必大詞

同日梁克家端明殿學士致賀書樞密院事

自給事中除四月

壬辰兼參知政事

克家字叔子軍人舉進士第一

六月己酉虞允文樞密使

自資政殿大學士知樞密院事四川宣撫使召除

制曰朕惟昔人臣之美見于詩雅之傳或經營四方

告成於上或飲御諸友受祉於朝君臣俱榮中外作

乂乃眷樞輔克勤王家有能奮庸既追繼於前哲式

序在位宜特隆於寵章

具官虞允文

學貫道原謀經帝載

眇綿在炳識獨昭於幾微酬酢佑神動自諧於節奏

出濟艱危之會亟收戡定之功荐職政塗茂昭賢業

俾宣使指往撫坤隅明師律於蠱敝之餘拔人才於

隱約之際振威靈於遠俗勿士行枚寬賦歛於疲氓

以爲保障豈特戎車之飭實惟邦本之寧茲命遄歸

協圖內治方倚毗於兵柄肆就正於使名載衍爰田  
併加真食以示褒優之異以明委任之專於戲宥密  
之嚴夙夜基命英雋之重精神析衝其益勵於壯猷  
以弼成於丕業

汪應辰詞

八月己丑陳俊卿左僕射自右僕射除左僕射同平章事兼樞密院

虞允文右僕射自樞密使除右僕射同平章事兼樞密使

俊卿左僕射制曰朕聞明主以論相為職大臣以格  
天為功欲高明之弗違蓋俯仰之無媿眷言良弼克  
迪前修率其忠忱持以悠久惟丕釐於景命在灼見  
於俊心肆舉徽章式昭異數具官陳俊卿學探道與躬踐

聖謨和順積中優造日新之盛發揚詡物悉皆時措  
之宜參秉政機獨司宰職嚴恭有恪每進盡忠之規  
儆戒無虞力陳經遠之計立身靡牽於毀譽取人罔  
間於舊新既蹇蹇以匪躬復綽綽而有裕茲登庸於  
上相仍兼統於樞元超進文階陪敦并賦以馭其貴  
豈徒極名器之崇適觀厥成將以究規模之遠於戲  
任大守重居安思危簡在上帝之心予敢忘於顧諟  
可久賢人之德爾毋怠於欽承其茂乃猷以輔予治  
允文右僕射制曰朕洪惟國朝之制竝建宰輔之司  
應繼守文咸底於道獻可替否各單厥心矧予繼承

惟日兢惕茂乃后德交修繫賴於同寅揚于王廷孚  
號式新於羣聽其登次相以叶舊章具官虞九文蘊識精  
微受才閎博自任以重心常在於生民匪夷所思智  
夙超於羣物獨發奇策克成雋功荐膺圖任之嚴允  
罄弼諧之益頃自右府往臨西師原隰既平藜藿不  
採晝日三接備聞入告之猷泰階六符益炳具瞻之  
望雖進膺於異數念未究於宏規茲陟辨章之崇仍  
兼宥密之舊超加爵秩增衍并封寵光既優委任采  
重於戲惟安危之注意蓋文武之兼資經營四方已  
昭著於成績總領衆職其茂恢於遠圖庶無兢之維

人亦有辭於永世

乾道六年

庚寅

五月陳俊卿罷左僕相

除觀文殿大學士知福州

制曰宅百揆以奮庸允賴弼諧之長總十連而建屏  
更資牧御之良迺睠元臣久煩幾務祈解秉鈞之任  
爰分制閫之權我有明緡告於列位具官陳俊卿性資端  
慤道術通明傳羽翼於初潛早識經綸之器竭股肱  
於詳試備輸啟沃之忠自登鼎司雅厭時望贊萬機  
而裁決克謹其微佐百度以彌縫率歸於正方倚同  
心之助迄成經遠之圖而乃豐貢囊封願還印綬既

屢形於優詔曾莫奪於忱衷入備三公雖總方而議  
政出爲二伯亦分職以理民惟時委寄之隆豈有中  
外之間勉從雅志庸渙茂恩冠祕殿以通班不改若  
瞻之望開全閩而作牧何殊畫錦之歸以昭體貌之  
私以厚始終之眷於戲山甫之將王命旣勤補衮之  
功申伯之式南邦宜被錫圭之寵徃茂幹方之略勿  
忘告后之猷

陳良佑詞

俊卿自乾道四年十月拜右僕射五年八月拜  
左僕射是年五月罷入相二年餘○初允文之  
始相也建議遣使金虜以陵寢爲請俊卿面陳

以爲未可復手疏陳之上感其言事得少緩至  
是允文復申前議二日上以手札諭俊卿曰朕  
痛念祖宗陵寢淪於腥膻者四十餘年今欲遣  
使往請卿意以爲如何俊卿奏曰陛下焦勞萬  
機日不暇給痛念陵寢思復故疆臣雖疲駑豈  
不知激昂憤切仰贊聖謨庶雪國恥然性質頑  
滯於國家大事每欲計其萬全不敢輕爲嘗試  
之舉是以前者留班面奏欲俟一二年間彼之  
疑心稍息吾之事力稍充乃可遣使往返之間  
又一二年彼必怒而以兵臨我然後徐起而應

之以逸待勞此古人所謂應兵其勝十可六七  
茲又仰承聖問臣之所見不過如此不敢改詞  
以迎合意指不敢依違以規免罪戾不敢僥倖  
以上誤國事惟陛下察之繼卽杜門上疏以必  
去爲請三上乃許出知福州陛辭猶勸上遠佞  
親賢修政事以攘夷狄泛使未可輕遣允文遂  
遣使竟不獲其要領○俊卿在相位曾覲官滿  
當代度其必將復入預請以浙東總管處之上  
曰覲意似不欲爲此官俊卿曰前此陛下出覲  
及大淵中外無不歎仰盛德今外間竊議以謂

覲必復來願陛下捐私恩以伸公議上稱善又  
之俊卿旣去覲亦召還遂建節旄歷使相以躋  
保傅而士大夫莫有敢言者○七年三月遷左  
銀青光祿大夫八年八月詔知福州陳俊卿提  
舉洞霄宮以引疾丐祠從所請也淳熙元年十  
月再知福州四年五月除特進提舉洞霄宮從  
所請也五年七月以判隆興府陳俊卿判建康  
府七年四月加少保八年二月除醴泉觀使在  
外任便居住進封申國公十年五月詔除少傅  
依前觀文殿大學士致仕以疾從其請也六月



詔陳俊卿已除少傅致仕所有應干恩數等並依前宰相例施行十一月詔並依史浩昨除少

傅已得指揮施行十三年正月詔曰屬茲歲首

奉我親歡制以少傅觀文殿大學士致仕福國

公陳俊卿授少師進封魏國公初封甲福國公後封魏謚正獻

閏五月癸巳梁克家參知政事兼同知樞密院事自

明殿學士簽書樞密院事除兼同知國用事七年三月癸未兼權知樞密院事

乾道七年辛卯

三月巳卯張說簽書樞密院事自明州觀察使知閩門事兼樞密副都承

除

戊子自簽書樞密院事改除安慶軍節度使提

舉萬壽觀八年二月癸丑自提舉萬壽觀復除

簽書樞密院事○初張說自知閣門事除簽樞

侍講張栻夜草手疏極言其不可且詣宰相謂

責之語甚切宰相慚憤不堪而上獨不以為忤

親札疏尾付宰相使諭旨栻復奏曰文武誠不

可偏然今欲右武以均二柄而所用乃得如此

之人非惟不足以服文吏之心正恐反激武臣

之怒上感悟命得中寢然宰相實陰主說明年

乃出栻知袁州而申說前命說後竟謫死云○

張說者父故省吏也說以父任爲右職妻憲聖  
皇后女弟由是累遷知閣門事

乾道八年

壬辰

二月辛亥虞允文左丞相

自右僕射除特進兼樞密使進封華國公

梁克家右丞相

自參知政事除兼樞密使

允文左丞相制曰朕紹休聖緒注意元台仰惟前代  
而迪厥官期咸寧於萬國爰立作相而置諸左肆命  
總於百工肇新岩石之瞻不聳朝紳之聽具官虞德  
全而才鉅氣裕而志剛以龍衣經華國之文成應變安  
民之武有力則陳而有猷則告恢恢致主之謀無利

不興而無害不除凜凜濟時之望徧儀中外久幹鈞  
樞以修明政教爲先以獎拔賢能爲急鎮物如嵩岱  
之勢其孰敢搖決事若著龜之明夫何能惑革乃因  
循之弊副予綜覈之方勤勞弗懈於初終啓沃愈殫  
於朝夕朕參稽古誼考協官稱運道揆於廟堂理無  
不統繫司存於禁省體有未專茲用新書首褒茂宰  
益展在前之略式符虛左之求仍總鴻樞特超賜位  
啓名邦於西土衍奉邑於多田以煥天文三階之光  
以增國勢九鼎之重於戲自周而上弼諧之道可稽  
由漢以來宰輔之官屢易惟正其名可以求其實惟

舉其要可以治其詳朕欲比德唐虞汝則監臯夔之事業朕欲希功文武汝則觀旦奭之規摹尚無媿於

前聞斯有辭於永世

周必大詞

克家右丞相制曰稷暨益以同謨舜帝謹幾康之戒召與周而竝相成王資左右之功朕肇正宰司簡求人望茲延登於次輔其具諗於廣庭

具官梁克家

行粹而

才高道醇而守正躬含章之素履茂格物之清規忠以事君告嘉猷而無隱敏於應務斷大事而有餘自進位於疑丞每協恭於廊廟恢四維而勵俗熙庶績以圖寧名實混淆汝則力裨於總敷事爲苟且汝則

密贊於更張凜有名臣之風浸隆賢弼之望朕方精求至理思茂永圖選衆而舉臯陶雖予衷之素定夢帝而賚傳說亦天意之使然會官制之適新宜國成之對秉同心輔政觀二臣調燮之能經體贊元革三府辨章之號旣端其本亦奮爾庸特超四等之階誕昭優渥參幹萬兵之柄滋厚倚毗肇開公社之封併衍國租之入若時異數實越常彝於戲祖宗閱遠之規朕方力紹今古弼諧之議汝則深知當正名求治之時任熙載亮功之寄進一言必曰順天之道立一事必曰因民之情惟百官各得其宜則萬務悉歸於

理勉思交飭允答具瞻

允文自五年八月拜右僕射兼樞密使獨相二年餘是年二月進左丞相兼樞使而命梁克家爲右丞相○淳熙十三年二月金紫光祿大夫右丞相儀國公梁克家授特進封鄭國公

○是月乙巳詔改左右僕射爲左右丞相勅門下朕惟帝王之世輔弼之臣其名雖殊而相之實一也在商湯時則有若仲虺在成王時則有若周召或左或右皆見於經厥後位號定於漢而稱謂汨於唐以僕臣而長百僚朕所不取且

丞相者道揆之任也三省者法守所自出也今捨其大而舉其細豈責實之誼虜肆朕稽古釐

而正之蓋名正則言順則事成爲政之先務也

其改尚書左右僕射同中書門下平章事爲左

右丞相庶幾採前代之舊成本朝之制焉周必大

三月戊子詔侍中與中書尚書二令官制雖存

皆設而不除可竝刪去以左右丞相充其位丙

申詳定一司勅令所言近承詔書改尚書左右

僕射同平章事爲左右丞相并又承指揮刪去

侍中中書尚書令官制以左右丞相充其位本

所已依指揮將條法刪去侍中中書尚書令及將左右僕射改以左右丞相立文外今照得紹熙舊法內一項諸太師太傅太保尚書左右僕射為宰相竊詳元豐元符舊令止以三省長官僕射為宰相所有三公亦為宰相蓋自政和以後因人創立即與舊制拜見今所行不同今欲於元條三少字下刪至為宰相字上却於太保為三公字下添入左右丞相為宰相字在少師字上緣尚書左右僕射舊非三省長官故為從一品今來左右丞相係充侍中中書尚書令之

位即合為正一品諸太師太傅太保為三公左右丞相為宰相少師少傅少保為三少從之

癸丑王之奇端明殿學士簽書樞密院事

自吏部侍郎權尚書

賜同進士出身除

丙寅曾懷參知政事

自戶部尚書賜同進士出身除

八年十一月權提舉編修玉牒監修國史

九月戊寅虞允文罷左丞相

授少師武安軍節度使充四川宣撫使進封雍

國公

制曰保王躬而式百辟爰推上宰之功紹大業而綏四方正賴元臣之助眷言時傑久秉國鈞宣勞既積

於我家求去願還於相綏宜加隆委就錫優恩誕告  
 大廷敷為茂命具官虞允文高風鎮物奧學潛神謀謀具  
 合於著龜誠信自期於金石式疇瞻知寢陟顯途方  
 為言語之官已蒞師干之事曩江干之開釁窺重險  
 以馮陵煽稜象以滔天締妖氛而貫日彼兇匪茹斷  
 流正擬於投鞭我道有光制命殆同於折箠坐失羣  
 雄之七筋居成萬里之金湯泰階于以告平鼎鉉為  
 之增重永言忠壯厥有本原遂持樞宥之權即奉岷  
 梁之使噐與名竝位由德躋替法座之懿綱實相以  
 濟翊岩廊之景化有功見知方觀績用之優乃上封

章之力重違其請實難輟於弼諧庸聽其歸蓋雅資  
 於綏撫是用錫榮名於孤保寵鉅鎮之節旄以昭左  
 棘之華以大中軍之制胙之成國衍以爰田為六十  
 州晏粲之基啓八百國興隆之勢於戲陳平盡護漢  
 家倚以差強李靖一行唐室於焉大競勉迪徽數用  
 恢遠圖

宣撫使王炎召還議代之者允文請行遂有是  
 命至興元未幾以疾革請致仕拜少傅卒淳熙  
 元年四月贈少師四年十二月上幸茅灘講武  
 戈鎧光明進退坐作精習衆十萬皆驍銳上顧

輔臣太息曰頃者虞相力行揀汰之法衆論皆以爲不可今諸軍無一老弱始見成效六年四月上思采石之功詔特贈太傅謚忠肅始封濟華後封

雍

乾道九年癸巳

正月辛未王之奇罷簽書樞密院事資政殿學士知揚州淮南路安撫使

撫使

之奇自乾道八年二月除簽書樞密院事是年

正月罷在樞府幾一年

乙亥張說同知樞密院事自安慶軍節度使簽書樞密院事除

沈復端明殿學士簽書樞密院事自戶部侍郎兼侍講兼同修國史兼

實錄院同修撰除

辛巳鄭聞端明殿學士簽書樞密院事自權刑部尚書兼侍讀兼

修玉牒官除

已丑王炎罷樞密使觀文殿學士提舉臨安府洞霄宮

炎自乾道四年二月除簽書樞密院事五年二

月除參知政事七年七月拜樞密使依前四川

宣撫使是年正月罷執政凡五月○淳熙元年

十二月以觀文殿學士太中大夫知潭州二年

五月臣僚論蔣芾王炎張說欺君之罪竝詔落

職居住炎落觀文殿學士袁州居住三年七月  
 上宣諭龍茂良等曰有一事累日欲與卿言昨  
 湯邦彥論蔣芾王炎張說三人者朕思之王炎  
 似無大過非二人之比茂良等奏仰見聖明洞  
 照邦彥所論王炎事多非其實人皆能言之宜  
 蒙聖恩寬貸上曰未欲便與差遣且令自便三  
 年十二月中大夫新知荆南府王炎復資政殿  
 大學士以赦恩檢舉也後以通議大夫致仕贈  
 銀青光祿大夫

十月辛未梁克家罷右丞相

自左宣奉大夫罷為觀文殿大學士知建寧府

制曰宅百揆以亮工夙重股肱之寄殿大邦而維屏  
 允資牧御之良進退雖列於兩塗中外蓋同於一體  
 眷惟右輔求解近司肆頒詔綽之公用宜朝紳之聽

具官梁克家

清名肅物雅量鎮浮蹈君子之中庸夷險不

更其守備賢人之德業語默必惟其時曩收鼎董之  
 科亟奉嚴徐之對言謨罄忠嘉之蘊文章舒邦國之  
 華越自禁林晉陪廟論參基命於宥密且宣夙夜之  
 勞贊獨化於陶鈞遂處弼諧之任再暮於此百度向  
 成以用人為立政之先以勸農為富民之本方共熙  
 於庶績乃願釋於繁機累貢奏封力陳疾疢閉平津



之閣弗爲朕留圖申伯之居勉從爾志學士冠延恩  
之寵富沙號節鎮之雄併舉徽章式昭異眷於戲入  
而論道旣隆岩石之瞻出則剖符增煥潛藩之望往  
祇茂渥尚告遠猷

王淮詞

克家自乾道八年二月拜右丞相是年十月罷  
入相十年及八月淳熙元年十二月詔宰相當  
守法度以正百官梁克家違制差過員數最多  
僛服闋日落觀文殿大學士六年正月以資政  
殿大學士宣奉大夫提舉洞霄宮梁克家知福  
州淳熙八年正月乞宮祠上曰與復觀文殿大

學士依舊自知福州九年詔爲醴泉觀使兼侍讀

甲戌曾懷右丞相

自參知政事遷左宣奉大夫除

制曰朕丕承慈訓允迪大猷制治保邦克謹幾康之  
戒圖事揆策是資弼亮之賢肆登進於舊人爰敷告  
於列位具官曾懷器博而用遠實大而聲闋謙崇君子  
之風卑以自牧蹇蹇勵王臣之操知無不爲夙推心  
德之同起赴事功之會清而容物善靡近名服在禁  
塗持橐罄論思之効擢居計相理財通損益之宜惟  
道學之素優故經綸之有裕比協輿人之望俾參大  
政之元閱歲于茲厥功甚茂總諸儒而著錄寶牒用

光贊百度以彌縫朝綱式敘顧岩瞻之允屬適鼎席  
之方虛寵陞右輔之聯妙幹洪均之重肇開公社增  
峻文階以昭物采之華以侈圭腴之盛於戲魏相務  
行故事漢家果致於中興房喬善建嘉謀唐室遂隆  
於正觀矧惟廼祖實相昭陵其克對於前聞以有辭  
於永世王淮詞

同日張說知樞密院事自同知樞密院事除

鄭聞參知政事自端明殿學士簽書樞密院事遷左中大夫除

沈復同知樞密院事自端明殿學士簽書樞密院事遷左中大夫除

十二月甲子沈復罷同知樞密院事自左中大夫罷為資政殿學士

知荆南府

復自是年正月除簽書樞密院事十月除同知

樞密院事是月罷在樞府幾一年。初復除簽

書樞密院事時梁克家為右丞相朝有大政必

與復熟議而後行張說在樞筦實以恩進復守

正不阿議多不合十月除中大夫同知樞密院

事克家去國復亦巧退章屢上累詔不允最後

還其奏復在告待罪上遣使諭之至是遂有是

命

已丑姚憲端明殿學士簽書樞密院事自御史中丞兼侍讀除

○是歲定百官雜壓次序諸太師太傅太保左丞相右丞相少師少傅少保樞密使開府儀同三司知樞密院事參知政事同知樞密院事樞密副使簽書樞密院事太子太師太傅太保特進觀文殿大學士太尉太子少師少傅少保觀文殿學士資政殿大學士附見

宋宰輔編年錄卷之十七終

宋宰輔編年錄卷之十八

宋太常博士徐自明著

孝宗淳熙元年甲午

三月丙申鄭聞罷參知政事除資政殿大學士四川宣撫使

聞自乾道九年正月除簽書樞密院事十月除

參知政事是年三月罷執政一年餘

四月己卯姚憲參知政事自端明殿學士簽書樞密院事遷中大夫除

是年三月省文階左右字

葉衡端明殿學士簽書樞密院事自朝散大夫戶部尚書除六月丁丑

兼權參知政事

六月戊寅會懷罷右丞相觀文殿大學士提舉太平制曰全進退之義大臣式謹於廉隅存終始之恩明主蓋優於體貌乃眷弼諧之老懇辭宰柄之勤爰錫明綸敷告列位具官會懷疏通而膚斂靖重而裕和挺挺祖風綽有典刑之舊恢恢才刃了無盤錯之難自簡予衷言績之事十年主計源流本末之洞知一節匪躬獻納論思之不替越躋政路擢寘鼎司庶幾穆天綽而迪民彝予以持道揆而嚴法守曾閱時之未久乃移疾而有陳近醫藥而專精神既屢頒於中詔乞骸骨而上印綬復薦貢於忱詞慨然志之莫回哀寵章

而加貴冠崇班於書殿允為儒者之榮賦厚祿於祠庭仍就里門之逸茲誠異數庸表眷懷於戲后德惟臣雖莫遂貪賢之美爾身在外尚無忘告后之猷益介壽祺永綏譽處王淮詞

懷自乾道九年十月拜右丞相是年六月罷入相凡七月

癸未姚憲罷叅知政事

除端明殿學士在外官觀

憲自乾道九年十二月除簽書樞密院事是年四月除叅知政事六月罷在政府半年言者論憲與臺臣詹亢宗等通謀陷曾懷以傾奪其相

位故有是命憲尋責居南康軍

同日葉衡叅知政事

自端明殿學士簽書樞密院事兼權叅知政事遷中大夫除十月詔兼權知樞密院事

七月丁亥鄭聞叅知政事

自資政殿學士大中大夫四川宣撫使除

聞再為叅知政事十月丁卯卒輟朝

壬辰曾懷右丞相

自觀文殿大學士提舉太平興國宮遷光祿大夫除再入相

制曰三台宣符色齊明而星度正二氣播物和咸感

而歲功成迺眷耆賢夙居揆路屬懇辭之濟至式邁

其行逮疑謗之洞開使復其位敷予有命告爾在庭

具官端重而無華寬容而有裕學探古今之蘊氣涵

天地之全才略濟繁更百為而彌劭智謀經遠周萬

變以皆通蚤簡深知歷敷要任有績咸又靡勤弗宣

迄登政地之庸旋正宰司之位從容調娛而協時幾

之會造次啟沃而陳久大之圖心休休而善容猶翼

翼以祇畏還觀忠實益厚倚毗嘉宏業之方隆駭流

言之不靖爰狗告歸之請俾從均佚之私朕廣開至

正之門茂建大中之極攷昔君臣之相遇允繫於同

心維時上下之弗交亦先於除間肆詳加於審覈已

備見於昭明又缺我折念稍違於近輔疇若予采恐

寢隳於前規是用誕錫恩章趣還鼎席總領繁機之

要燮諧大化之元具袞衣而迎周公庶率循於往訓

啟延英而待裴度已欽佇於嘉猷仍進文階併增井  
賦是爲殊寵亶穆輿情於戲無競維人有孚在道日  
月照矣茲蓋釋於嫌猜股肱良哉宜力圖於報効尚  
堅素節永翊丕基

崔敦詩詞

先是臺臣詹亢宗季棠論李杓王宗已因中懷  
懷遂求退且乞辨明誣謗續棘寺根究無實乃  
貶責亢宗及棠而復相懷

七月己未張說罷知樞密院事

太尉提舉隆興府王隆觀依前安慶軍節

度使

制曰幹樞極以居中夙任本兵之寄視政塗而疏寵

峻升掌武之階惟時左右之良積有勤勞之助茲遽

祈於均逸宜申錫於茂恩

且官張說

性稟裕和才資通敏

深詩閱禮嘗折節以好脩趨事赴功思飭躬而自勵

蚤被慈皇之眷晉司上閤之嚴暨予纂紹於慶基俾

爾導承於密旨謂踐敷之滋久當信謹而不渝分闔

龍舒旣陟建旄之貴運籌虎幄復資借筮之謀朕方

愛日以有爲厲精而更化念歲陰之屢改亦班序之

浸高循名實以責成與勳庸之亟就何乃奏封之上

願從散地之安佩金印以名官有華其秩卽琳宮而

曳組式懋爾勞禮遇所加始終無負於戲惟名與器

朕固戒假人之私既哲且明爾尚迪保身之道既祗  
猷訓永稱寵榮

說自乾道八年二月除簽書樞密院事九年正  
月除同知樞密院事十月除知樞密院事是年  
七月罷在樞府凡二年餘其後臣僚論太尉安  
軍慶節度使張說欺君之罪降充明州觀察使  
撫州居住

同日楊倓簽書樞密院事

自昭慶軍節度使提舉佑  
神觀除

倓初授昭慶軍節度使依前提舉佑神觀制曰奉祠  
宮而均逸又叅儒職之華開將闔以展容蓋示恩章

之異眷惟禁路時有俊臣推予褒賞之能作爾功名  
之會誕敷丕冊孚告大廷

具官  
楊倓

渾厚而雄深方嚴而

肅括忠義由於世濟通明稟於天資才略應繁刃發

矧而有裕智謀周變龜獻兆以無遺歷更事任之宜

積著功勞之盛逮司國用具觀運理之長旋卽里居

深見靖共之譽茲被張旌之遣曾無引道之艱是用

申錫溫綸優加茂典建齋壇而授節撫瓊管以殿藩

明庶以功實參圖於素効克紹乃辟尚追繼於前規

仍從仙館之遊復啟侯封之寵陪敦采邑增衍真奮

於戲治匪異塗材難具美文武維憲爰得亮邦之賢

威儀則多是昭馭貴之體克祇厥訓益固乃猷崔敦詩詞  
倓字子靖代州崞縣人紹興大將存中之子也

### 中進士第

十一月戊戌龔茂良叅知政事

自禮部侍郎兼權吏部尚書除

茂良字實之世爲錢塘人六世祖避錢氏之亂  
遂家于莆甲辰輔臣內殿奏事畢賜坐上顧葉

衡龔茂良曰兩叅政皆公議所與衡等起謝

丙午曾懷罷右丞相

除觀文殿大學士提舉洞霄宮  
依前光祿大夫

制曰經體贊元夙展弼諧之效辭榮避寵宜加禮遇  
之隆眷時著英司我宰柄屢控丐閑之請爰推均佚

之仁申錫徽章誕敷渙號

具官曾懷端莊而有守和易而

不流孝自家傳承三朝之相業才周世用通萬貨之

利源朕以其休休有容物之心惓惓得愛君之誼付

之以政庸究爾能調娛百度而各適於中登進庶僚

而不失其序講張並作當風波可畏之塗履尚素端

凜松栢後凋之操載還廊廟獨秉鈞衡方夙夜之仰

成俄晦明之爽節爰許小車之駕仍勤便殿之咨任

盖猶於股肱禮豈求於筋力而頓興歸志荐貢忱辭

雖神明所扶顧何恙而不已起居惟適重以事而閔

勞其聽解於繁機用申哀於異數延恩通籍冠學士



之穹班大滌領祠憇洞天之真境式昭體貌俾遂燕  
頤以旌勇退之高以表服勤之久於戲若時奮庸熙  
帝載旣膺宅揆之圖罔以寵利居成功斯盡保身之  
哲徃綏壽嘏允迪令猷

王淮詞

懷自是年七月復拜右丞相是月罷再入相四  
月懷以疾自請故有是命十二月懷以違制差  
過負數最多降充觀文殿學士尋以觀文殿大  
學士光祿大夫致仕贈少保十三年閏七月詔

故宰相曾懷落觀文殿大學士以變賣恩澤

故也

同日葉衡右丞相

自兼樞密使參知政事遷通奉大

夫除

制曰聖人以道觀能職莫先於論相儒者在朝廷政  
任尤重於經邦朕憂勤日攬於萬機贊襄允賴於一  
德疇若弼諧之命肆登參預之英揆以剛辰敷時渙

號

具官

才猷敏邵智略通明素蘊曾中有致主澤民

之學若陳掌上皆富國強兵之謀策高足而據要  
津遇盤根而知利器出分制闡屢宣填拊之勞入履  
禁塗綽着論思之益粵陞樞筦遂翊化元予欲旌廉  
汝則擇人而公薦予欲久任汝能抗疏以歷陳事每  
契於時宜志密毗於王度言念奮庸之久愈深注意  
之誠若建厦待汝爲棟梁若濟川待汝爲舟楫屬袞

闕之當補惟岩瞻之具依是用延登宰路之崇兼總  
籌帷之運超三階而進秩增煥彝章冠五等以疏封  
式昭異數仍衍圭腴之入以彰物采之華於戲熙帝  
載而亮天功務罄彌綸之効領衆職而稱朕意毋忘  
綜核之規其悉乃心同底于治

是月楊倓罷簽書樞密院事

以昭慶軍節度使知荆南府

倓在樞府三月餘出知荆南府後再知江陵府  
右正言葛邲論其罪提舉王隆萬壽觀八年三  
月卒遺表有旨贈太尉

十二月丁巳李彥穎端明殿學士簽書樞密院事

自

部尚書兼太子詹事兼侍讀除

彥穎字秀叔雲川人

淳熙二年乙未

五月沈寔同知樞密院事

自資政殿大學士中大夫四川宣撫使除

九月乙未葉衡罷右丞相

依前中奉大夫知建寧府

衡自淳熙元年十一月拜右相是年九月罷入  
相凡十月○右司諫湯邦彥論右丞相葉衡惟  
務險悞以爲身謀變亂是非遂有此命言者不  
已遂併建寧罷之三年二月責授散官郴州安  
置六年八月詔責授安德軍節度副使葉衡又

在謫籍游經恩霈特與叙復中大夫在外宮觀  
十年四月詔復通議大夫依前提舉洞霄宮從  
吏部檢舉也五月卒贈資政殿學士依條與致  
仕遺表恩澤

閏九月丁未沈復罷同知樞密院事 知鎮江府

四年五月自資政殿大學士中大夫知鎮江府

改知福州以太中大夫致仕十三年六月賜謚

曰簡肅以其子承奉郎炳請也

丁巳李彥頴參知政事 自端明殿學士簽書樞密院事除

王淮端明殿學士簽書樞密院事 自翰林學士知制誥除

淮字季海金華人

淳熙三年 丙申

七月王淮參知政事 自中大夫同知樞密院事除

六月丁丑龔茂良罷參知政事 除資政殿學士知鎮江府

茂良自淳熙元年十一月參知政事是年六月

罷執政二年餘○會覲與茂良爭使相奏補法

一日退朝覲當道不避茂良翼日奏白上前曰

臣固不足道所惜者朝廷大體爾上遣中使諭

覲詣政府謝茂良取其直省官撻之御筆宣問

施行太遽茂良抗章待罪六月茂良求去益力

內批除資政殿學士知鎮江府奏乞謝辭詔令  
內殿奏事手疏六事論恢復之具曰天意曰人  
事曰財賦曰將帥而所以用之者曰謀曰時既  
退臣僚論茂良擅權植黨上親洒宸翰諭以體  
貌大臣之意再上落職罷七月臣僚復論茂良  
四罪言茂良行丞相事首尾三年屢對賓客廣  
六月座肆言茂良以智名勇功為戒凡遇臣僚奏對  
有及邊備利害必遭譏罵陛辭之日具疏方有  
所論凡數百言此可誅一也云云尋責授寧遠  
軍節度副使英州安置明年卒于貶所得旨歸

葬十年追復通奉大夫十一月詔特與致仕恩  
澤二名遺表一名十五年追復資政殿學士

十一月庚子趙雄同知樞密院事自簽書樞密院除

淳熙五年戊戌

三月李彥穎罷叅知政事自通議大夫除資政殿學士知紹興府

彥穎自淳熙元年十二月除簽書樞密院事二  
年閏九月除叅知政事是年三月罷執政三年  
餘彥穎以久贊機政奉身可閑故有是除

壬子史浩右丞相自觀文殿大學士充醴泉觀使兼侍讀永國公依前少保授右丞相

進封衛國公再入相

制曰朕儀圖俊傑勩相邦家受命溥將協濟藝祖興王之業治民祇懼共恢光堯復古之勲念弄印者累年嘗命龜而載卜人惟求舊旣朕志之素孚民具爾瞻亦物情之衆允渙以大號揚于外朝具官史浩道廣而智周才宏而德備經綸之蘊蚤自許於功名寬裕之懷時莫窺其器量東學翼天飛之運中階符帝賚之祥自弼亮於初元卽宣昭於美業敬王如孟子非仁義不陳於前告后若君陳有謀猷乃順于外方叅和於鼎飪旋力解於機衡比趣召環進陪經幄姬公邁返初無四國之言裴度求歸尚使兩河之畏屬宵旰

厲精之日適辨章虛席之時宜續前功再膺大任易零陵之舊壤啟淇水之新封增衍土田併隆體貌惟任之不輕則望之彌重惟始之不易則終之實難予其仰成人且觀政於戲兆姓輯於下然後可以調陰陽四維張於朝然後可以正法度堅忠實之志則不革絕親黨之私則除授罔不公使奠枕如淳化端拱之間而迓衡如至和皇祐之際庶益光於舊學斯無負於殊知

公旣再相孝宗曰自葉衡罷虛位以待丞相久矣與執政入謝德壽宮高宗曰卿再入相天下

之幸也 行狀

四月丙寅范成大叅知政事 自禮部尚書兼直學士院遷中大夫除

成大字致能吳郡人

六月乙酉錢良臣端明殿學士簽書樞密院事 自給事中除

良臣字友魏嘉興華亭人

甲戌范成大罷叅知政事 除資政殿學士知婺州

成大自是年四月除叅知政事是月罷執政僅

兩月御史疏論成大請以本官奉祠詔從之七

年二月起知明州八年二月除端明殿學士三

月改帥江東兼行宮留守十年八月乞宮觀輔

臣進呈上曰成大歷典大藩備著勞效可除資

政殿學士提舉洞霄宮光宗卽位下求言之詔

詔曰卿以文章德行師表縉紳受知聖父致位

丞弼均佚方面乃心王室於天下事講之熟矣

其悉意以陳以副朕傾想之意紹熙三年加大

學士四年九月薨官至通議大夫贈銀青光祿

大夫

己未王淮知樞密院事 自叅知政事除

趙雄叅知政事 自同知樞密院事除

十一月甲戌史浩罷右丞相 授少傅保寧軍節度充醴泉觀使兼侍讀依前

衛國公

制曰一相勤勞處內既懷均佚之心三孤德義輔予  
 斯厚優賢之禮眷言宿望懇避繁機誕推從欲之仁  
 顯布告廷之命具官史浩恭寬敏惠明允篤誠浹萬事之  
 周材見諸施設貫六經之要道祭以詞章會風雲於  
 潛躍之中翊日月於照臨之始燮調元化經綸之譽  
 孔昭寧輯黎民屏翰之功亦著粵從再相浸閱三時  
 邦彛循清淨之規王度嚮粹夷之美方深注意共宸  
 迓衡迺荐控於衷誠殊弗居於寵利囊封莫遏陟典  
 難稽希冕篆車進新班於亞傳雕戈錫盾還舊節於

東陽表儀虎觀之儒先燕息祥源之使領拓其奉邑  
 衍以真畬昔昌朝敷皇祐之經創班聯於秘殿而公  
 亮釋熙寧之政兼將相於內祠茲參兩朝優異之恩  
 庸作一代着英之寵於戲仲山甫既明且哲夙高補  
 袞之勲房元齡善始以終寧復吝權之意夫已遠一  
 日萬微之不務則將聞二帝三王之昌言謀焉就之  
 遐不謂矣

浩自是年三月拜右丞相是月罷在相位八閱  
 月○十月諸軍以多闕額又有逃亡請得自招  
 捕許之而並緣強取被略者或至斷指以求免

都下洶洶公飛奏盡釋所捕又禽爲首者送棘寺宣華宰輔等議罪欲取兵民各一人梟首以徇公謂未得其平兵士可斬百姓陸慶童當坐流罪上怒不以爲然公曰陛下恐軍人有語而以百姓爲可欺耶爭之益力上愈怒公議罪如初遂求去位除少傅保寧軍節度使充醴泉觀使兼侍讀後有言慶童之寃者孝宗曰史浩蓋嘗力爭坐此求去至今悔之賜第城中出御制長春花酒詩酬和至再以示眷留之意公屢求歸時陳俊卿已奉祠八年二月除荆建康府公奏俊卿年未七十而求去臣以七十有六而往豈不愧見吏民邪依舊在京宮觀兼侍讀孝宗嘗自擬館職策極言取士用人之弊大要謂國朝過於忠厚以示公公讀畢奏曰太宗不忍殺一不辜以得天下累朝仁德至仁宗而大備夫忠厚豈有過耶孝宗曰非卿不能爲此言五月始許歸除少師進封魯國公

制曰出處人臣之大致世難名節之全爵齒天下之達尊國繫典刑之重眷言元老留處內祠茲具諭於誠衷願卽歸於田里用錫爾祉式邁其行

具官史浩

才巨



而識明德全而行備履常無競恂恂忠厚之風樂善  
有容渾渾沉深之度委釋經綸之任從容問燕之談  
神明未衰於前賜問相望于道方深厚遇遽起冲懷  
叩黼座以據辭疊囊書而瀝請自陳歲月之邁必可  
山林之安承晝接之親每嘉猷而啟沃引夜行之戒  
乃思高蹈以全榮念感會之有初閱老成之無幾朝  
批章而太息暮覽奏以長思重違乃情圖昇厥寵是  
用渙揚茂命聽便故鄉旌轂趨朝進亞師之服位龜  
蒙奠壞開廣魯之山川衍以新畬仍其舊節惟名與  
器俾壽而昌於戲敷求前聞優待耆德皇祐之詔三  
老設几以須熙寧之遇四臣賫書而訪尚有斯禮勿  
遐爾心

十年少師史浩請老除太保致仕公嘗歷永衛  
魯三國公於是進封於魏仍令如曾公亮例入  
謝明年先降旨候至國門百官郊迎見畢對御  
賜宴用文彥博故事道中具辭再三奉俞音乃  
絕公晚治第西湖之左哀兩朝所賜御書建閣  
以處之因奏聞孝宗書明良慶會之閣以賜公  
謝不敢當孝宗曰古人願爲良臣卿輔朕之久  
日聞忠言深悟朕心尚何慊乎勅後苑造扁榜

命使馳賜之上嘗以舊學二字卽政事堂賜  
公同列咸曰自古際遇莫盛於此請鑿諸石爲  
省中榮觀公又謝不敢旣歸以名其堂歲遇誕  
日錫以金噐者十四年年八十又加寶噐兩宮  
使命相望高宗再舉慶典詔公隨班上壽進太  
傅賜王帶金魚踰月乃東公自五年十一月罷  
相仍侍經筵八年告歸得請一再召見恩賚深  
渥每以老先生呼之行狀十年六月浩以太保保  
寧軍節度使魏國公致仕

丁丑趙雄右丞相

自叅知政事遷正議大夫除

制曰朕紹天休運持國永圖內懷未究之規摹外愧  
難成之功業長撫遠馭將恢不世之基深識通材庶  
獲非常之輔有赫延登之命無逾歷試之賢具宣乃  
猶咸告爾衆具官趙雄噐全而用遠實大而轂閱臨事謀  
端○若元龜之信當機立發沛如流水之源密膺深  
知亟踐要路攷其才恢恢而有餘地驗其策斷斷而  
無空言灼知俊心可倚大任遂付以政用宏乃庸周  
旋三時醇○一節以智略通明贊朕事以道德寬大  
廣朕心民言維嘉國論以壹朕敷聞古昔注想英賢  
以言寤念則曷究於深誠以象營求則固非於素望

念此選舉疚于夙宵有能奮庸協我昌明之會曾是  
 在位得茲碩大之臣是用誕敷恩綸登授相柄廣宣  
 厥道俾盡展於良規無棄爾成尚汔終於顯績申加  
 采邑超進文階並出眷懷是崇體貌宜茲注意維以  
 蒙休於戲邃古之治益遙真儒之效浸寡維身克正  
 卿士庶尹無不宜維心克誠陰陽四時無不序勉摠  
 素蘊永底丕平

七年十二月以脩史書成自宣奉大夫授銀青

光祿大夫依前右丞相進封沂國公

同日王淮樞密院使

自知樞密院事遷中大夫除

制曰象着三辰斗極上通於帝紀政分二柄機庭內  
 總於兵權朕振長策以御邦綜大綱而撫世永惟軍  
 國之任並繫安危之圖茲有良臣久司右府既協同  
 於人望亦灼見於朕心遂升班聯授乃重寄消以  
 吉且諗于羣倫具官王淮剛正而守中高明而持重質諸  
 天地言顧行以無慙欲自朝廷實浮名而有裕曩踐  
 政路歷宣賢勞調娛萬微綏靖四國逮進登於宥密  
 益具罄於忠嘉尊俎之畫消難於未形帷幄之言進  
 規於不逮事必汝訪謀無予欺邦其尊榮民以寧壹  
 朕叅稽古誼簡畀事權勃輔漢家實倚本兵之重蠡

綱年錄 卷之十八 十七  
謀越國亦專主外之長是用誕頒恩書升正使號式  
序爾位亞端揆以同登克壯其猶秉神樞而獨制仍  
陪戶邑併陟文階是由至懷庶表優禮於戲賢人之  
業可大副予體貌之崇天下之務惟幾藉爾精神之  
運勉堅一意汔底多盤

七年十二月以脩史書成自通奉大夫授正議

大夫依前樞密使進封信國公

乙亥錢良臣叅知政事

自簽書樞密院事除

淳熙七年

庚子

五月戊辰周必大叅知政事

自吏部尚書除

謝廓然端明殿學士簽書樞密院事

自刑部尚書除

必大字洪道吉州人廓然字

人

淳熙八年

辛丑

八月趙雄罷右丞相

自銀青光祿大夫沂國公除觀文殿大學士四川安撫置使兼

知成都府

制曰朕推誠宰路興治邦圖專任而倚成功方賴謀  
謨之益勞謙而廸終吉迄難志願之違疇異數以寵  
行擇巨藩而命鎮消以穀旦告于治朝

具官趙雄

材鉅而

識高氣全而量遠光明碩大皇皇人物之宗廣博靖  
深渾渾廟堂之噐登進端揆敷宣大猶薦才常采於

公言立政悉循於直道國論咸穆輿情具宜遽覽封章願辭機務方仰成之無間豈引去之當言細札溫詞已示曲留之意高情亮節愈堅勇退之心簡于深懷厚以殊遇眷惟蜀道實重益都綜張箕舒翼之營控歷井捫參之勢旣資君重壯方面之金湯仍使公歸耀故鄉之袞繡更超加於儒職庸增重於民瞻茂著忠勞具昭眷禮於戲唐姚崇之相適俱及於三年周申甫之賢亦于蕃於四國尚膺休命益懋顯庸

雄自淳熙五年十一月拜右丞相是年八月罷入相二年餘時有言雄多私里黨者於是命大

臣進擬皆於姓名下注本貫封入遂爲故事十年自知廬州知江陵府十四年十月除特進判江陵光宗卽位下求言之詔詔曰卿以碩德重望受知聖皇輔政典藩綽有成績已頒召節俾筮闕庭入告嘉猷行畫對敷之益星言夙駕勿辭跋履之勞予欲亟聞切直之規卿其深體傾渴之意凡軍國之利害生民之休戚悉宜條陳先以驛奏自餘忠益尚冀面求四月特進觀文殿大學士判江陵府荆湖北路安撫使沂國公趙雄奏先准聖旨令赴行在奏事尋具奏懇免

仍乞外祠蒙降詔不允依已降指揮疾速前來者乞追寢前命詔可特轉一官依舊判江陵府

閏五月特受寧武軍節度使開府儀同三司判

江陵府進封衛國公紹熙元年六月詔判潼川

府趙雄依所乞克醴泉觀使

始封沂後封衛

王淮右丞相

自樞密使信國公除光祿大夫兼樞密使進封福國公

制曰人主論一相紀綱舉則庶績熙上賢爲三公儒術行則大治起朕選建哲輔協圖康功夜夢想以營求朝咨諏而博采帝賚予弼夙推成德之良民具爾瞻茲屬已然之效渙此休命告于明廷具官王淮亮直而

渾深清明而篤實以貫通三極之學發於宏毅之資以運理萬物之才行以安和之度更踐政路勤施王家奮明略以憲邦抱純誠而事上逮冠宥府益聞嘉猷辭氣從容幄中之畫已定精神孚達天下之患自消泯功用於不言贊謀猷於獨運朕勵精求治望古興懷皇天付予以生民念當躋於富厚太上授予以丕業思盡復於升平撫歲月以浩然履基圖而惕若疇若予采邇求厥寧是用酌于師虞畀以宰柄崇於體貌旣超漢爵之階徹彼山川仍奠閩邦之壤因念安危之寄固難文武之分俾兼元樞遂合大政具昭

卷之十八  
三十一  
眷倚茂輯勲庸於戲歷攷帝王之盛朝永懷臣主之  
亨會譬諸脩漢爾其爲羽翼以遊喻彼洪荒爾其爲  
舟楫以濟尚膺懋典益究洪圖

甲寅謝廓然同知樞密院事

九月兼權參知政事

九月庚寅錢良臣罷參知政事

除資政殿學士在外  
宮觀

良臣自淳熙五年六月除簽書樞密事十一月

除參知政事是年九月罷執政凡三年餘十年

三月詔正奉大夫知鎮江府錢良臣治郡踰年

職事脩舉可除端明殿學士依舊知鎮江府十

二年正月知建康府兼行宮留守錢良臣除資

政殿學士十四年八月良臣在建康府已四年

以方面難得人除資政殿大學士依舊知建康

十五年八月提舉洞霄宮從其請也光宗卽位

下求言之詔詔曰卿二府舊臣宣力滋多壽

皇之所擢任而坤人之所注想者也嘉謨嘉猷

奚必咨問而後樂告哉實賴箴規以毗初政十

六年十二月卒積官宣奉大夫贈金紫光祿大

夫謚文惠孝宗嘗詢時事所陳合上意孝宗褒

之曰如卿真所謂通世務之儒遂書通儒以賜

之上在春宮又書雲漢昭回之閣以賜之

淳熙九年 壬寅

六月丁巳同知樞密院事謝廓然致仕

廓然自淳熙七年五月除簽書樞密院事八年八月除同知樞密院事至是年六月以中大夫守本官職致仕在樞府二年餘是月戊午卒贈光祿大夫資政殿學士

七月壬辰李彥穎罷叅知政事

自通議大夫依舊資政殿學士提舉洞霄宮

彥穎以疾乞解機政故有是命十年正月右諫議大夫張大經論叅政李彥穎不能治家體國乞罷資政殿學士詔特降為中大夫光宗卽位

下求言之詔詔曰卿精忠粹德士林之冠冕嘉謨碩畫今代之著蔡膺聖父之圖任助坤人之緝熙養浩家居心在王室軍國之務至孰悉也朕不忘卿卿其肯忘朕乎其悉條上以副眷想七月詔資政殿大學士左正奉大夫提舉洞霄宮李彥穎久在潛藩老成靜退可除觀文殿學士依舊官觀是月臣僚奏今自宰相執政侍從卿監正朝郎員郎分為五等除致仕遺表已行集議裁減外今將逐郊蔭補恩澤每等降殺以兩酌中定為正數宰相一十人開府已上同執



政八人太尉同侍從六人詔從之

九月庚午王淮左丞相

自右丞相兼樞密使福國公加特進封冀國公

梁克家右丞相

自觀文殿學士醴泉觀使兼侍讀遷金紫光祿大夫進封儀國公

淮左丞相制曰朕適廣燕謀紹開駿命內則振大綱而總核外則揆長策而經營天烝我成功將盡復祖宗之緒帝賚予良弼方并持文武之權疇首贊於廟謨肆丕敷於廷號具官王淮擴先覺之蘊挺大受之姿約六經而成文才獨高於黼黻兼三王而施事學自富於經綸似不能言而智足以决天下之疑如不勝衣而勇足以任天下之重夙簡登庸之望荐疇開濟之

圖時最久於輔庭功尤多於宥密逮居百揆彌變萬機揚協帝之重華輯效君之衆美謙恭率下德乃大而而容諒直處中誠則久而無息除吏靡私於親故振民請惠於困窮問邊備則戎夷寢狼子之心問師律則將帥厲虎臣之氣是用繇右弼而陞左輔益聳於具瞻顓東府而解西樞復循於彝典盖建隆之初造與慶曆之既平除授具存規模可攷茲仍分於二柄肆稽合於兩朝啟南國而冠崇階疏多畬而衍真賦以章廉陞九級之遠以顯泰符三階之平予欲格天和陰陽以爾爲璣衡而齊七政予欲導民厚風俗

以爾爲卜筮而孚四方予欲董正臣工爾其總於衆  
職予欲救寧方夏爾其斷於大謀尚光續於前功庶  
永垂於令問

克家右丞相制曰朕躬攬皇綱力恢聖緒以繩武則  
遠邁藝祖一定之策以繼志則近守慈皇再造之模  
天祐生賢早出扶於熙運人惟求舊復登庸於繁機  
朝無間言國有成命消辰斯吉渙號其孚

具官梁道  
克家

公靜而邃深德寬博而閎大東南盛溫厚之氣蓋稟  
其全英俊陳治平之原嘗居其首碩望徧儀於華要  
瑰才亟贊於機微逮進秉於化鈞果深裨於治體百

僚是式方疇董正之功四國于蕃荐省阜成之化外  
則教條班于侯服內則福潤蒙于帝都民言維嘉賢  
業以大緬懷故相參攷本朝在明道則有李迪之重  
來在景祐則有王曾之再入皆裒然之舉首兼籍之  
甚名袞繡端歸廟堂增重是用召自長樂寘于邇英  
眷精神之益強肆體貌之加渥祥應于上象復正於  
登三績著于前講尚存於畫一盛揆天人之意具咨  
邦國之謀式副巖瞻亟存柄任俾緝熙於帝載以對  
亮於天功如益稷之同謨如周召之並相超文階之  
異等進名壤之新封載衍多畚陪䟽真采庶幾今日

之治復似仁皇之時於戲不得臯陶為舜之憂朕既  
圖於舊德罔俾阿衡專商之美爾尚迪於前彞必使  
萬物皆已得宜以至四夷罔不咸賴庶前功之不替  
則廣譽之無窮

同日周必大知樞密院事

自參知政事同提舉詳定  
一司敕令除

十二月丁丑施師點端明殿學士簽書樞密院事

自朝

請大夫給事中兼太子詹事十年正月丙戌兼  
權參知政事

師點字聖與其先世雪川人五季時徙家上饒  
嘗假翰林院學士克金國賀正旦使致命虜庭  
立班既定儀者以親王將至命師點退一位師

點屹然不動相儀者復

師點正色曰班

立已定尚何為久之終不徙步班列相目駭愕  
知師點有守也使還復命有聞于上上嘉歎不  
已後賀正旦虜使至闕問館伴以師點今居何  
官師點立班館伴宇文价目示之虜使曰一見  
正人令人眼明正月除端明殿學士簽書樞密  
院事入奏控免上曰卿靖重有守識慮深遠朕  
欲擢用久矣復詔兼知參政

淳熙十年

癸卯

八月戊申施師點參知政事兼同知樞密院事

自端明殿

學士簽書樞密院事兼權叅知政事遷中大夫除

師點嘗同宰臣奏事退復同知樞密周必大進呈上曰適來一二事卿等各陳所見甚得朝廷大體前此宰相奏事執政不措辭今卿等如此副所望必大深奏曰祖宗時宰執奏事自相可否或至面相切責退亦不相銜自奏檜用事執政畏避不敢言今陛下虚心兼聽若只宰相奏事何用執政爲師點復奏曰臣蒙陛下擢用自媿素餐疊蒙聖訓敢不竭股肱之力時州郡上供嘗有立歲終比較之法者及是主計之臣好爲督趣以露已功乞不待歲終先期行之畫命下師點曰此策若行諸司州郡文移稠疊上下逼迫姦吏舞文病民民不聊生力陳其故或謂令已出師點曰事有爲天下病惟恨更之不速卽追寢其議請者聞師點言益內媿周必大舉手賀師點曰使天下赤子不被其毒者公之賜也閏月辭兼同知

黃洽叅知政事

自御史中丞兼侍講遷中大夫除

洽字德潤福州人

淳熙十一年

甲辰

六月庚申周必大樞密使

自知樞密院事除

必大辭樞密使劄子臣竊觀本朝故事機庭置長或使或知蓋因人才之優劣別資望之輕重元豐肇新官制始刊使名雖有聖諭實惜之也自是四十餘年莫之或改建炎紹興間二揆嘗司兵柄亦不過曰兼知院事而已尋因舊相召還復令充使以示優禮其後或勳舊官至公孤或終賢名重帷幄間有除授而非積歲月之勞所能至也伏望姑仍舊次亟免新綸批答曰卿名世瓌才經邦茂業踐脩端直識詣高闕越自

疑丞進司機要夙宵匪懈中外以寧又曰國家建右府以總戎昭命儒臣而崇使領蓋自太平興國以來成憲具在迄在于今茲必以閎才碩學見聞殫洽者任之豈非兼文武之用明政事之體乎卿博通古今德茂先覺發爲謀謨足以斷國論措諸事業足以恢政經夙被簡知延登樞近遠猷碩畫宏益居多乃疇已試之庸申峻久虛之職蓋將資精神之運懋勳烈之隆使四夷咸賓萬邦底乂茲爲美報安事固辭

淳熙十三年

丙午

閏七月戊申留正端明殿學士簽書樞密院事自敷文閣

學士除

正字仲至泉州人

十一月丙寅梁克家罷右丞相觀文殿大學士克體

特進國公

制曰具瞻而秉國鈞久賴經邦之輔移病而歸相印

肆宏就第之恩矐予廟社之英斬解機衡之重申盼

明命亶告昕廷具官梁克家敦厚而直温忱恂而簡亮衰

為舉首貴名早壓於紳綏灼見俊心瓌望允隆於耆

老自載儀於大柄益增耀於中台處躬如權石之平

宰物驗耆龜之决陰陽燮理百穀用成良俊登崇九

功惟叙覽觀事業踰前後之數公典領策書究春秋

之五傳方履浸昌之會適罹無妄之災暫云偃息以

在床未爽進為而撫世遽陳懇款規即退藏留行屢

飭於訓辭勇去莫回於雅志庸稽故實加貴宗工即

學士之大稱仍文階之極品珍臺間館獨冠臯伊之

倫魁廣厦細旃上論唐虞之盛際式昭朕意曲便爾

私於戲有榮觀而燕處超然既閔勞於官職俾純嘏

而弗祿康矣更入告於謀猷佇聞藥喜之亨尚迪棟

隆之吉

克家自淳熙九年九月拜右丞相是年十一月

罷再入相四年餘詔史浩舊第令梁克家居止

明年夏卒謚文靖 初封儀後封鄭

淳熙十四年 丁未

二月丁亥周必大右丞相

自樞密使遷光祿大夫除

制曰分政柄於東西久重樞庭之任咨廟謨於左右

並崇宰路之瞻迺睠鴻儒寔嚴命宥越自本兵之長

進登次相之尊爰告昕朝式敷坦制

具官周必大

行醇

而守正識茂而慮周經綸包萬變之微綜彙洞群言

之奧修身有道審觀君子之樞機正色在朝稔著賢

人之德業運帷籌於密勿增國體於安彊天下之務

惟幾深究英謀之秘儒者之效已試寢更歲華之多

茲疇弼直之良務簡忠勞之最熙帝之載禮特厚

於奮庸代天之工識敢輕於理物匪資碩望孰懋宏

猷儀圖爾能夾輔予治乾台彪烈象益炳於六符廟

鉉燮和勢更隆於九鼎峻陟文階之秩申開采邑之

封稽于僉諧萃此徽渥於戲唐虞建官之制莫先百

揆之司周召作輔之勲實出群賢之表予欲上參於

盛際汝其遠紹於前脩陰陽調則庶類遂其宜刑政

清則蒸民樂其業內俾紀綱之尤振外臻彊宇之永

寧咸思翊贊之方庸體倚毗之意尚恢績用奚埃訓

詞

十五年九月右丞相周必大進封濟國公以明堂禮成加恩也

戊子施師點知樞密院事自參知政事除

師點惓惓搜訪人才手書置鞶囊中謂蜀去朝廷遠人才難自見師點即蜀士之賢者俾各疏所知差次其才行學文得之每詳或有除授必列陳之一日薦胡晉臣上曰已用為監司矣師點曰晉臣宜置之內為○上為召入及對上稱

其才師點曰以臣觀之廊廟器也後至大用

八月癸未留正參知政事兼同知樞密院事自簽書樞密院

除事

明堂進封制曰具官留正蚤歷禁嚴之地屢更岳牧之司

實修於已而氓然忘名仁根所性而動則有勇入佐鈞樞之務肇新軍國之容康濟率自中具孚人望謀猷告于內摠合朕心

淳熙十五年戊申

正月庚申施師點罷知樞密院事除資政殿大學士知泉州

師點自淳熙九年十二月除簽書樞密院事十



年八月除叅知政事十四年二月除知樞密院  
事是年正月罷執政凡五年繼除提舉洞霄宮  
光宗卽位下求言之詔詔曰卿乃壽皇之元樞  
而冲人之舊學也處心平而持論正更事多而  
慮患遠去國未久豈能遂忘朝廷乎凡事之有  
關於軍國而有益於初政其啟告朕諒卿忠蓋  
必體至懷紹熙二年除知隆興府三年二月薨  
年六十九五月贈故資政殿大學士正奉大夫  
致仕施師點金紫光祿大夫

甲子黃洽知樞密院事自叅知政事除

蕭燧叅知政事自吏部尚書除十六年正月兼權知樞密院事

洽明堂進封制曰朕若昔大猷三舉宗祈之典相予

肆祀五分使範之聯具官黃洽器大而穀宏任重而道遠

淵乎見叔度之量忠矣識子文之心伏青蒲則木正

於從繩抗白簡則雪消於見現進聞邦政有温良恭

儉之風默運帷籌無智名勇功之迹云云

燧明堂進封制曰具官蕭燧出藩于外則悃幅無華入侍

于内則温恭有恪六卿分職獨高禁近之班四輔惟

人遂正疑丞之位名實既加於上下老成亦重於典

刑

燧字照隣臨江人既貳大政權監修國史日曆  
 明年兼權知樞密院事孝宗深知之初為諫議  
 大夫入謝上曰卿議論鯁切不求名譽糾正姦  
 邪不恤讐怨又每稱其全護善類誠實不欺他  
 日大臣奏事上語曰蕭燧其人質直無緣飾御  
 書二十八將傳論以賜最後去樞府辭日上復  
 有勉從卿去之語其為孝宗信遇如此

五月己亥王淮罷左僕射

除觀文殿大學士判衢州兼管內  
 勸農使依前特進魯國公

制曰輔贊而箴諸用首殫經治之勤明哲以保其身  
 特厚殿邦之渥眷時元老久正上台首祈解於機衡

肆優加於體貌誕申渙號勅告公朝具官王淮醇懿粹和  
 洪深端靜包舉衆善而得其正調娛官度而歸于中  
 自持魁柄之崇深極巖瞻之峻祇承王命居啟沃以  
 為忠表倡民區雅阜成之是務載念歲時之積具知  
 夙夜之勞惟肱股分治於四方且垣翰間謀於三事  
 等重輕而注意參內外以考功廼擇郡符實連鄉社  
 上丞相之綬姑狗冲懷視太守之章勉綏雅俗躡殿  
 廬之華貫侈學士之大名是為儒者之榮允答政塗  
 之瘁於戲御臣以禮尚留近地之容論相惟難深惜  
 舊人之去往欽寵數益茂顯猷

淮自八年八月拜右丞相九年九月拜左丞相  
是年五月罷入相六年餘六月甲寅朔詔新判  
衢州王淮提舉洞霄宮從其請也光宗卽位下  
求言之詔詔曰卿曩以經術羽翼朕躬以德業  
股肱聖父周旋政地十有四年凡國家之利害  
生民之休戚與夫政事因革損益之宜知之詳  
而見之熟矣有可以裨朕者其悉以告朕將受  
而行之庶資忠規以副虛佇八月詔王淮除少  
保依前觀文殿大學士致仕九月贈少師

淳熙十六年 己酉

正月丙申黃洽罷知樞密院事

資政殿大學士知隆興府

洽自淳熙十年八月除叅知政事十五年正月  
除知樞密院事是年正月罷執政五年餘光宗  
卽位下求言之詔詔曰卿以學儒之彥被遇聖  
父圖任共政績用章明均佚价藩去國未久以  
卿之素蘊有可爲初政之助者其悉以聞此朕  
之所注想於卿而卿之所輸誠而樂告者也紹  
熙元年十月以通議大夫提舉洞霄宮

己亥周必大左丞相

自右丞相濟國公除特進進封許國公

留正右丞相

自叅知政事兼同知樞密院事遷通奉大夫除

必六左丞相制曰帝咨百揆以亮功蓋取衆賢之協  
王命六官而分職莫如冢宰之尊朕稽述洪猷儀圖  
俊德睠弼諧於政體俾登冠於台司誕布明綸格于  
公聽具官周必大道推先覺行迪大儒秉直方之氣而濟  
以疏通之才廓高遠之識而輔以醇正之學瞭若著  
龜之兆理灼見於古今確然金石之姿節靡渝於  
夙夜踐更二府酬酢萬機自進秉於國鈞迺備宣於  
賢韞謀謨乎上足以康庶事表厲乎下足以正群工  
陰陽理而物遂其宜社稷安而國家其利比繇顛任  
期以首公望采峻於中朝位宜崇於上相紫綬金印

之寵卽廊○以不移黃耳金鉉之虛與泰符而增煥  
褒敷斯至倚屬匪輕政已治則尤務於調娛勢已安  
則當思於振飭肆華資之超進仍名秩之序陞衍拓  
爰租申陪真食併從令典式備優恩於戲仲虺爲左  
相於湯寔懋日新之德高平觀故事於漢益明時用  
之宜化惟久可以有成志惟堅可以有立使茂業克  
安於萬世則令名無媿於前人勉迪訓言欽承眷意  
正右丞相制曰朝廷爲政事之本必崇任於直賢王  
者置輔弼之官實疇咨於同德朕厲精萬務表治庶  
工眷言參預之勤久積具瞻之望擢陞揆路懋翼邦

圖寵以廷揚具官留正才宏識敏學邃理明道

君子之常應百爲而有守任天下之重采衆善以爲

公自縮帥權趣膺召渥出藩入輔浸高密勿之聯武

締文經并建長久之道內翊廟巖之穆外綏疆瓊之

安成績居多褒章可後是用進從二府置位中台若

元首之有股肱共恢於邦體若巨川之作舟楫協濟

於化源朝論正則廉節具昭士論孚則勞能並萃惟

幾康而弼直選掄敢輕載清靜以民寧規恢益重爾

期予治予匪爾私仍稽懿典之常併陟文階之峻荒

開采邑衍實豐租式備恩徽聿崇宰柄於戲帝賚傳

說以沃商宗之心天授留侯其興漢世之業惟盡忠

足以體眷毗之厚惟加勉足以究施設之宜俾予永

底於阜康繫汝與膺於休美尚祇茂命彌集顯庸

光宗卽位二月壬辰必大授少保依前左丞相進封

益國公正授正奉大夫依前右丞相清源郡開國公

必大加少保制曰朕祇奉慈謀欽承丕緒任大守重

豈夙夜之敢康謨明弼諧繫股肱之攸賴眷予上宰

爲國宗臣旣久翊於熙朝茲首禪於初政宜疏異渥

以答殊勲爰輯廷紳誕揚詔綽具官周忱恂而博達

端亮而精夷經濟之才足以開物而成務淵源之學



輔佐而繼統業雖無事於更張當間暇而明政刑尚  
益思於勵翼往祗厥命其永有辭

紹熙元年正月甲戌正以修製奉上壽聖皇太  
后至尊聖皇帝壽成皇后尊號冊寶充禮儀使

遷宣奉大夫

同日王藺參知政事 自禮部尚書除

葛邲同知樞密院事 自刑部尚書除

藺參知政事制曰 具官王藺 自居班列即藺朕心聽其議

論見其可以有行觀其風采知其足以任重處之朝  
廷則貪佞自遠試以方面則威名益聞涵養既克氣

識深厚比召前於宣室遂擢長於春官朕所眷懷用  
之猶為未盡人之屬望歉然常若有餘不踰閱月之  
間俾贊中台之重朕每憂一日萬機之繁未之攸濟  
爾當思千載一時之遇惟既厥心適觀爾成同歸于  
治

邲同知樞密院事制曰朕建東西二府以議大政

兩柄以恢遠圖宜得老成之儒贊吾夙夜之命爰

疇碩望增重公朝 具官葛邲 學洞古今文參造化議論通

達究經術淵源之歸資稟粹和得東南温厚之氣小

心一德事朕歷年徧儀華近之班備罄論思之益父

祖迭居於法從時乃世臣穀名充滿於朝廷宜為先  
覺擢自秋官之長進陪斗極之嚴云

藺字 無為人 邲字楚輔安吉人

乙巳蕭燧罷叅知政事除資政殿學士提舉臨安府洞霄宮

燧自淳熙十五年正月除叅知政事是年正月  
罷執政一年初詔燧為資政殿學士與邲既而  
燧乞奉祠從所請依舊職名提舉洞霄宮光宗  
卽位下求言之詔詔曰卿以純明亮直嘗位三  
事聖父之所改容而體貌者也肆予坤人頃賴  
羽翼夫卿既以清節雅行從朕於潛晦之時豈

不能以忠言嘉謨助朕於纂承之始竚聞猷告  
以副虛懷燧手疏六事語甚剴切表乞休致優  
詔不允紹熙四年卒年七十七積官宣奉大夫  
特贈金紫光祿大夫謚正肅燧學問精博持身  
至雪論事金石聲色貨利無所徇接物雖和然  
不可干以私安恬不競人不得而親踈



宋宰輔編年錄卷之十八終



